

JEHOFA-JIREH ¹

 Dulang. Se ke sebakabotse se segolo, go tla morago gape bošegong bjo. Gomme tšegofatšo ye kgolo go nna, go tla le go bolela le lena ka ga Morena wa rena Jesu, Yo ke nago le kgonthē gore bontši bja lena le a mo tseba, goba ke a holofela le a dira, ka go tshwarelong ya dibe tša lena le—le ka tsela ya mogau wa Gagwe, go lena. Gomme A nke a le abele, bošegong bjo, bontši bja mogau wa Gagwe. Ge re tloga mo, a nke re kgone go bolela, boka bale ba bego ba etla go tšwa Emause, “Dipelo tša rena di tukile ka gare ga rena, ge A be a bolela le rena mmogo tseleng.”

² Bjale, mosong wo mongwe le wo mongwe, ke a dumela ba na le mo—mo—mo monna wa dikamano tša setšhaba bjalo ka yena. Mna. Vayle mo o na le thu—thu thuto, mohuta wa go araba dipotšišo le go bolela ka Lengwalo. A yola o gona ka moagong wo? Thwi ka moagong wo, wa moso. Gomme ge e ka ba mang a lokologile, le badiredi tsoko, goba go ya pele, ba ka rata go etela, gabaneng, e ka ba mang o amogetšwe. Gomme Ngwanešu Vayle ka kgonthē ke morutiši wa go teba. Ka kgonthē, o ne thuto ye botse.

³ Gomme ka fao, ke boletše letšatši le lengwe, ke—ke duma ge nkabe ke na le thuto. Ke swanetše go šomiša diswantšho, boka se sengwe gape, go hhalosa, le a tseba. Ga ke ne thuto ya go lekanelā go e fetlekolla. Eupša ka mokgwa wo mongwe, goba wo mongwe, Morena o nthuša go e feta.

⁴ Gomme kafao ke a elelwa, nako ye nngwe go be go le mo—mo monna ka Lengwalong, leina la gagwe e be e le Johane, gomme tatagwe e be e le moprista. Ka mehla, ba latetše se tatago bona a se dirilego. Eupša o be ka kgonthē a na le molaetša; o be a swanetše go bega Mesia. Gomme bjale ge a ile tlase go sekolo sa moo tatagwe a ilego, ba rile, “Bjale, o tseba morategi Ngwanešu *Semangmang?* Yoo e no ba Mesia,” ba nyakile ba mmoleletše ka go yona. Kafao, le a bona, ga se a ye go sekolo sa mohuta woo.

⁵ O ile ka lešokeng, moo a ithutilego Modimo. Le hlokomela melaetša ya gagwe, go tšwela ntle? Ga se a ke a ba le thuto. O ile ka gare ka mengwaga ye senyane bogolo, a tšwela ntle ka masometharo, a rera dikgwedi tše tshela, gomme a bolawa. Bjale re hwetša gore o be a fela. . . O rile, boka Bafarisei ba etla ntle, le Basadutsei, gomme o rile, “Oo, lena moloko wa dinoga!” Seo ke se a se bonego ka lešokeng; dinoga, se sengwe seo e lego ditšhila le go thelela, le go fora. Le a bona?

⁶ Bjale yo mongwe a ka be a rile, “Gobaneng, lena dikarolwana tše nnyane tša go hloka mohola tša go se kgodišege,” goba se sengwe. Eupša o . . .

⁷ Eupša, le a bona, o be a sa tsebe mantšu go a šomiša, kafao o nno re, "Lena moloko wa dinoga," seo ke se a se bonego ka lešokeng. O rile, "Ke mang a le seboditšego go tšhabela bogale bjo bo tlago? Le se ke la thoma go bolela, gore 'Re na le, ke ren a ba ye gomme re be ba yela,' ka gobane Modimo o kgona go tšwa matlapeng a," se a se bonego, "go tsoetša Abraham bana. Gomme selepe se beilwe modung wa mohlare." O tsebile a dire eng ka mohlare wo mobe. "Mang kapa mang yo a tšweletšago kenywa e sego ye botse, o remelwa fase gomme a lahlelwa mollong," go tšuma dikgong tše mpe.

⁸ Le a bona, molaetša wa gagwe wohle e be e le se sengwe sa tlhago, o ile a o swantšha. Batho ba go tlwaelega ba kwešiša seo. Gomme ka gona ba...ke a nagana dinako tše dingwe go ka no ba bokaonana gannyane go dira go feta mantšu a magolo a ao batho ba ithutago ka sekolong.

⁹ Bjale, re be re thari gannyane bošego bja go feta, ka fao re leka go le ntšhetša ntle feela ka nako, bošegong bjo, ge ka kgonagalo re ka kgona. Gomme ke a tshepa gore Morena a ka se e dumelele go na gampe kudu bošegong bjo, mo tlhakeng ya masenke ye, kafao re tla no dumela le—le go leka go Mo direla, bokaonekaone bja tsebo ya rena.

¹⁰ Bjale a re emeng ge re bala Lentšu la Modimo, ge re bala bjale go tšwa go Puku ya Genesi. Gomme re thoma go tema ya 22 le temana ya 7, go bala ya 14, go akaretša.

*Gomme Isaka o boletše le Abraham tatagwe, gomme o rile, Tate wa ka: gomme o rile, Ke nna yo, morwa wa ka.
Gomme o rile, Bona mollo le dikgong: eupša e kae kwa kwana bakeng sa se sehlabelo sa go tshungwa?*

*Gomme Abraham o rile, Morwa wa ka, Modimo o tla ineela yenamong kwana ya se sehlabelo sa go tshungwa:
kafao ba sepetše mmogo bobedi bja bona.*

Gomme ba tla go lefelo leo Modimo a mmoditšego ka lona; gomme Abraham o agile aletara fao, gomme a bea dikgong ka lenaneo, gomme a tlema...morwa wa gagwe mong, gomme o mmeile godimo ga aletara godimo ga dikgong.

Gomme Abraham o otlolotše seatla sa gagwe, gomme o tšere thipa go bolaya morwa wa gagwe.

Gomme morongwa wa MORENA o mmiditše go tšwa legodimong, gomme o rile, Abraham, Abraham: gomme o rile, Ke nna yo.

Gomme o rile, Se bee seatla sa gago godimo ga mohlankana, ebole o se bee...godimo ga gagwe: gobane Ke a tseba gore o boifa Modimo, go boneng ga se o gane...wa se gane ka wa gago...morwa a nnoši go nna.

Gomme Abraham o phagamišitše mahlo a gagwe, le go lebelela, gomme a bona ka morago ga gagwe kgapa e kgokilwe ka se sekgweng ka dinaka: gomme Abraham o ile gomme a tsea kgapa, gomme a e neela godimo bjalo ka moneelo wa go tshungwa ka... legatong la morwa wa gagwe.

Gomme Abraham a reela leina la le lefelo Jehofa-jireh: bjalo ka ge go bolelwa go fihla letšatši le, Mo thabeng ya MORENA e tla bonwa.

¹¹ A re inamišeng dihlogo tša rena feela nakwana le go neela thapelo.

¹² Tate wa rena wa Legodimong, re botšwa ke Lentšu le, e lego Modimo, gore, “Tumelo e tla ka go kwa, gomme go kwa Lentšu la Modimo.” Gomme bjale, Tate, re a rapela gore O tla fa go rena kgwekgwe ya palo ye, gore re ke re ithute bjalo ka ge go boletswe ke Beibele, gore, “Dilo tšeō tšohle morago ka go Testamente ya Kgale e be e le mehlala yeo re swanetšego go e bona.” Go bao ba obamelago pitšo ya Modimo, ba šegofaditswe. Bao ba e ganago, ba rogakilwe. Kafao re a rapela, Tate, gore re tla ba le kwešišo, bošegong bjo, ka kutollo. A nke Moya wo Mokgethwa o utolle go rena dilo tše di lebanego le rena ka letšatšing le, yohle e utilwe ka go sephiri se segolo se sa Modimo seo se bilego ge e sa le motheong wa lefase. Ka gore re e kgopela Leineng la Jesu. Amene.

Le ka dula.

¹³ Ke nyaka go bolela ka thuto, Morena ge a rata, go tšwa kgopolong ya: *Jehofa-Jireh*. Lentšu le ra “Modimo o tla ipha sehlabelo ka Boyena.”

¹⁴ Gomme re bolela ka Abraham, gomme ye e be e le nako yeo a bego a lebeletše bakeng sa morwa wa tshepišo. Go hwetša therešo ya kgontha ya se, re tla ya morago. Gomme ye e be e le ka go tema ya 22. Re nyaka go etela morago; ke na le Mangwalo a se makae a ngwadilwe ntle mo, ao ke nyakago go šupa go wona, ge go kgonega. Gomme ke nyaka go bolela ka ona, gomme ke nyaka go thoma go tloga go tema ya 12. Re tla ya morago go hwetša gore moanegwa yo Abraham ke mang, gomme bjale ka fao—ka fao go tlilego gore Modimo a mo kgethe.

¹⁵ Re a tseba gore tshepišo e filwe go Abraham le Peu ya gagwe ka morago ga gagwe, gomme feela go ba ka go Abraham re bajabohwa le yena le tshepišo. Bjale Abraham o bile le peu, gomme peu, ka nnete, e be e le, o bile le peu ye ntši, dipeu, eupša o be a na le Peu e tee yeo tshepišo e bego e le go yona. O bile le Ishmaele; gomme ka gona morago ga ge Sarah a hwile, o nyetše mosadi yo mongwe gomme o bile le barwa ba šupa ntle le barwedi; gomme bohole ke peu ya Abraham, eupša... dipeu tša Abraham, eupša Peu e bile yona e bilego le tshepišo. Gomme Peu, gabotse, ke tumelo ya Abraham, yeo a bilego le yona ka go Lentšu la Modimo le le tshepišitšwego.

¹⁶ Bjale Abraham, re a hwetša, re...ga a bonale go fihla re mo hwetša fa e ka ba tema ya 12. Tema ya 11 ya Genesi, re hwetša gore tatagwe o tlide tlase go tšwa Babilonia. Gomme Abraham e be e no ba monna wa mehleng, feela bjalo ka wena goba nna, goba yo mongwe gape. Gomme o be a eba, ke ra gore, se re ka se naganago, monna wa go tšofala. O be a le bogolo bja mengwaga ye masomešupa tlhano. O be a nyetše kgaetšedi wa gagwe wa seripa. Leina la gagwe e be e le Sarah. Gomme leina la gagwe nako yeo, ka nnene, e be e se Abraham, e be e le Abram. Gomme—gomme la gagwe e be e le Sarai. Kafao re hwetša gore o be a le mengwaga ye lesome bonnyane go yena, go mo dirilego masometshela tlhano, gomme yena bogolo bja mengwaga ye masomešupatlhano.

¹⁷ Go molaleng, gore e be e le molemi, o phetše ka moedding wa Siniara kua, gomme a phela bophelo bja tlwaelo. Go molaleng o—o ile ntle ka nako ya mosegare, gomme a hwetša nama ya gagwe go tšwa sethokgweng, le go fula mahlatswa, gomme o phetše mohuta woo wa bophelo. Feel a motho wa mehleng, go be go se selo sa go ikgetha ka yena. Eupša letšatši le lengwe, Modimo o mmiditše. Seo ke se se dirilego phapano, ge Modimo a dirile pitšo.

¹⁸ Gomme ke ka tsela ye go lego go bophelo bjo bongwe le bjo bongwe. Go tsea Modimo. Ga se se o se dirago; ke se Modimo a se dirago. Le a bona? O re, “Ke nyakile Modimo. Ke nyakile Modimo.” O fošitše. Ga go motho yo a nyakago Modimo. Modimo o nyaka motho. Le a bona? Ga se wena o nyakago Modimo; ke Modimo a go nyakago.

¹⁹ Jesu o rile, “Ga se la Nkgetha, eupša Ke le kgethile.” Le a bona? Kafao o kgethilwe pele ga motheo wa lefase, goba ga se o kgethwe le gatee. O no tla go lopolla leina leo. Gomme bohle bao maina a bona a sego godimo ga Puku yela ya Kwana ya Bophelo... pele ga motheo wa lefase, ke bona ba nnoši ba yago go ba fale, go le bjalo. Le a bona? O kgethilwe ka go Yena pele ga motheo wa lefase. Ge Kwana e be e kgethwa, gona o kgethilwe le Yena, pele ga motheo.

²⁰ Gomme wena o, bjalo ka ge ke boletše bošego bja go feta, kgopolu ya monagano wa Modimo. Le a bona, yeo ke tsela e nnoši o ka bago wa Gosafelego, gomme sebopego se nnoši sa Bophelo bjo Bosafelego. Go na le sebopego se tee feela sa Bophelo bjo Bosafelego, gomme seo ke Modimo. Kafao, seo ke sohle, Yena ke yo Motee yoo a lego wa Gosafelego.

²¹ Bjale re hwetša gore Abraham o bile le lefelo lela. Gomme Modimo, ka go Testamente ya Kgale, o šomišitše dikai le meriti, go laetša se A bego a eya go se dira.

²² Bjale re hwetša fa gore Modimo o boletše le yena. Gomme selo se segolo, morago ga ge Modimo a mmiditše... Pitšo ye Modimo a e filego e be e le pitšo ya kagodimogatlhago. Eupša, go

le bjalo, ga se ya ke ya tekatekiša Abraham, ga go nako. Ka mehla o tsebile gore e be e le Modimo. Seo ke selo se segolo. Ge . . .

²³ Dipitšo tša Modimo ke tša kagodimogathago; ga go selo sa tlhago. Modimo o tšea tša kagodimogatlhago gomme a di šoma ntle ka tlhagong, eupša dipitšo tša Modimo ke tša kagodimogatlhago. Beibele e rile, “Dimpho le dipitšo di ka ntle ga tshokologo.” Le a bona, e beetswepele ke—ke Modimo.

²⁴ Bjale re hwetša gore, ka go se, gore Abraham o biditšwe, o kwele segalontšu sa Modimo, gomme O mmoditše se sengwe seo se bego se nyakile go sa kgonagale ka go felelela. Yena a le bogolo bja mengwaga ye masomešupa tlhano, mosadimogatša wa gagwe bogolo bja mengwaga ye masometshelatlhano, seo se tla mo dira e ka ba mengwaga ye masomepedi go feta menophose, gomme o phetše le yena ge e sa le a be a le mosetsana. Ba be ba se ne bana. Gomme, go le bjalo, o mmoditše gore ba be ba eya go ba le lesea, gomme ka lesea le lefase ka moka, ditšhaba tšohle, di tla šegofatšwa. Bjale seo ke selo sa go tlaba.

²⁵ “Gomme Abraham,” Beibele e boletše ka go Baroma tema ya 4, “ga se a tekateka go tshepišo ya Modimo ka gosedumele, eupša o be a tiile, a efa tumišo go Modimo.”

²⁶ Ke kgona go eleletša, morago ga kgwedi ya mathomo . . . Nnete, Sarah, bjalo ka ge ke boletše, o be a fetile menophose. Kgwedi ya mathomo, ke kgona go eleletša Abraham a rile, “Sarah, o ikwa bjang, hani?”

“Ga go phapano.”

²⁷ “Gabotse, šegofatša Modimo re ya go ba le lesea, golebjalo. Re no ya go ba le lona. Modimo o rile re be re le.”

²⁸ Sarah, o rokile dietana tše nnyane, gomme a hwetša koromo le diphini, le se sengwe le se sengwe; o bile komana, go ba komana bakeng sa lona, gobane o tsebile o be a eya go ba le lona. Modimo o boletše bjalo. Le a bona?

²⁹ Ngwaga wa pele o fetile. “A o ikwela phapano e ka ba efe, hani?”

“Ga go phapano le gatee.”

³⁰ “Tumišang Modimo! E tla ba mohlolo wo mogolwane bjale go feta ka mo o bego o le lekga la mathomo. Le a bona, ke ngwaga moragwana. Ke ya go ba le lona, go le bjalo.” Gobaneng? Modimo o boletše bjalo. Seo se a e rumu. Modimo o boletše bjalo. Re . . . Modimo o boletše bjalo.

³¹ Mengwaga ye lesome ya feta. “O ikwa bjang bjale, hani?” Šo yena masomešupa tlhano, gomme o masomeseswai tlhano.

³² Bjale a o ka kgona go eleletša monna le mosadi wa kgale ka mokgwa woo, lehono, ba eya tlase sepetlele, le go re, “Ngaka, re nyaka go dira ditokišetšo. Re ya . . .”?

³³ Modimo o go kgopela gore o dumele tše dingwe tša dilo tša nyefolo kudu, eupša ka mehla O e dira gabotse. Modimo... Motho yo a dumelago Modimo, ka go felela o dira bogafa, go lefase.

³⁴ A le kgona go eleletša Moshe, a hlahlilwe ka go bo—bo bohlale bjohle bja Baegepeta, hlogo ya madira, ma—ma—ma—ma madira a Egepeta. Gomme, efela, mengwaga ye masomenne go mo tšere go katišetša godimo go seo, gomme go tšere Modimo mengwaga ye masomenne go ntšha thuto yela ka go yena, feela se go se tšeago lefase go bea ka go yena. Mengwaga ye masomenne bontši, O mo dirile a katiswe gohle, thuto yohle, thutamodimo go tšwa go yena. Gomme O kopane le yena ka lehlakoreng la morago la leganata, gomme o tsebile bontši ka ga Modimo, mo metsotsong ye mehlano ka go Bogona bja Modimo, go feta a ithutile ka mengwaga ye masomenne go tšwa dipukung. Yeo ke nnete.

³⁵ Modimo ga a tsebje ka thuto. O tsebja ka tumelo. Gomme Modimo o boletše le yena ka go tša kagodimogatlhago. Gomme a selo sa go se tsebalege, dinako tše dingwe, Modimo a re dirago re dire.

³⁶ A o ka kgona go eleletša mokgalabje, masomeseswai a mengwaga bogolo, a kitima, moprofeta a tšhaba go tloga go Modimo? Gomme ka Bogoneng bja Modimo metsotsong ye mehlano: mosong wo o latelago (A le kgona go mo eleletša?), mokgalabje, tšhitšiboya e lekeletše tsela tlase ka mokgwa *wo*; hlogo ya gagwe ya lefatla e phadima; lepara la go kgopama ka seatleng sa gagwe; mosadimogatša wa gagwe a dutše go tlaralala mmoula, ka yo monnyane lethekeng la gagwe; tseleng go theoga!

“O ya kae, Moshe?”

“Ke ya tlase Egepeta, go yo thopa.”

³⁷ Le a bona, “go yo thopa,” tlhaselo ya monna o tee. Seo se kwagala bošilo. Eupša, selo sa yona e bile, o se dirile, ka gobane Modimo o boletše bjalo. Seo se a e ruma.

³⁸ Ge Modimo a bolela bjalo, seo ke sohle se lego go yona. Yeo ke—yeo ke yona. Ge Modimo a dirile tshepišo, lekeletše soulo ya gago godimo ga yona. Ge o ka kgona go e dumela, lekeletše ya gago... Ge o sa e dumele, dula kgole le yona; e tla go gobatša. Eupša ge o e dumela, dula le yona, e tla go iša phenyong, feela ka kgontha bjalo ka lefase.

³⁹ Bjale re hwetša, gore, “Abraham ga se a tekateka go tshepišo ya Modimo.” Gomme ge a be a le bogolo bja mengwaga ye lekgolo, gomme o be a le masomesenyane, ke kgona go mo kwa; ga a kgone le go bolela bjale, o tšofala kudu le go fokola, “Gabotse, Sarah, morategi, o ikwa bjang?”

“Gabotse, morategi, ga ke ikwele go fapania.”

⁴⁰ “Haleluya! Re ya—re ya go ba le lona, go le bjalo. Modimo o boletše bjalo, seo ke sohle se lego go yona. Modimo o file tshepišo.” O rile o be a “kgotšwe moka gore Modimo o be a kgona go dira se A se tshepišitšego.”

⁴¹ Gomme bjale re ipitša renabeng Peu ya Abraham, Peu ya gagwe ya Bogoši (e sego peu ya Isaka), Peu ya gagwe ya Bogoši, Kriste; le go tekateka go tshepišo e ka ba efe, go nganga le yona le go re ga go bjalo, le go e belaela ka menaganong ya rena? Ke a belaena rena go ba Peu ya Abraham ge re na le mohuta woo wa kgopolo ka go rena. Peu ya Abraham ga e tekatekišwe ke selo. E bitša dilo tše di bego di se gona, mo o ka rego di be di le gona, gobane Modimo o boletše bjalo. Yena ke Mohlodi. A ka kgona go e dira bjalo. O e tshepišitše, gomme seo se a e ruma. Seo ke sohle se lego go yona. Ge Modimo a e bolela, seo se ruma selo ka moka. Bjale, elelwang, o e nyakile . . . Go be go ka se kgone . . . O boditše . . .

⁴² Selo se sengwe A mmoditšego go se dira, go ikaroganya yenamong bjale go tloga go leloko la gagwe le batho ba gabu bohole.

⁴³ Modimo, gore a hwetše monna goba mosadi, mošemane goba mosetsana, go Mo obamela, o swanetše go ikaroganya ka bowena go tloga go ka moka gosedumele, yeo ke mnene, go fihlela ka go felelela o ikaroganya wenamong go tloga go e ka ba eng kgahlanong le Lentšu lela, gomme wa Le dumela. Lena . . . Modimo o bitša karogano moka.

⁴⁴ A phapano ye e lego gona lehono ka dikolong tše rena tše di romelago badiredi ntle. Ba ba kitela ka mehuta yohle ya gosedumele le diteori tše e sego tše Lengwalo go feta mohuta tsoko wa thutotumelo yeo ba itirelago, gomme morago ba ba romela ntle ka motheo wo bjalo ka woo. Ga go makatše re phaphašitše sehlopha sa boOswald le boJack Ruby, le go ya pele, go kgabaganya naga. Bokomonisi bo metša naga, gobane re na le diseminarie le bareri ba go alamelwa sebakeng sa ba go romelwa ke Modimo, ba go tswalwa gape, ba go tlatšwa ka Moya wo Mokgethwa, barwa ba Modimo ba go tswalwa ke Mollo, bana ba Abraham bao ba dumelago Lentšu la Modimo go gatelela Therešo gomme e sego se sengwe gape eupša Therešo, ba makgwakgwa, gomme ba kgona go ema fale godimo ga ditshepišo, mo pele ga e ka ba eng, le go e lebanya fase, gore ke Therešo. Ke Lentšu la Modimo. Go lokile.

⁴⁵ Bjale O rile, “Ikaroganye wenamong go tloga go lešika la gago lohle, go tloga go batho ba geno bohole, se sengwe le se sengwe, gomme o Ntatele.”

⁴⁶ Modimo ga se a fetola tsela ya Gagwe. Modimo ke Modimo mosefetoge. Tsela ye Modimo a dirago eng kapa eng, nako e tee, O swanetše go se dira ka tsela ya go swana lekga la bobedi. Elelwang, ge le ka kgona go bona tiro ya Modimo nako efe

kapa efe, ge A . . . Ge—ge motho a lahlegile, gomme O phološitše motho godimo ga motheo wa sephetho e ka ba sefe se rilego A se dirilego, go ya go ile O swanetše go dula le sephetho sa go swana. Ga A kgone go se fetola. Le a bona? Yena ke mohlokamagomo.

⁴⁷ Re ne magomo. Ke kgona go tseba kudu gosasa go feta ke tsebago lehono. Kafao le ka kgona go tseba bontši ngwaga wo o latelago go feta le dira ngwageng wo. O tseba kudu ngwaga wo go feta o dirile ngwaga wa go feta, eupša e sego Modimo.

⁴⁸ O phethagetše, mohlokamagomo. Se sengwe le se sengwe A se dirago se phethagetše. A ka se kgone go dira sephetho lehono le go dira se sekaonana gosasa. Sa Gagwe sa pele se phethagetše. Kagona, o ka no lekeletša soulo ya gago go e ka ba eng A e bolelago, ke Therešo.

⁴⁹ Modimo o bileditšwe nako ye nngwe go dira sephetho, ka fao a ka phološago motho, gomme tsela ye A dirilego e bile godimo ga motheo wa Madi a tšholotšwego a yo Motee wa go hloka molato, ka tšhemong ya Edene. Gomme motho o lekile se sengwe le se sengwe ka lefaseng go phološa motho, ka mokgwa wo mongwe; ba agile ditoropokgolo, ba agile ditora, ba bile le mekgatlo, dithuto, le se sengwe le se sengwe gape, gomme selo ka moka e no ba lefeela la mafela. Go na le tsela e tee feela yeo Modimo a phološago motho, ke ka Madi a tšholotšwego a Mohlokamolato. Yeo ke tsela e nnoši. Seo e bile sephetho sa mathomo sa Modimo. O dula le sona ka mehla.

⁵⁰ Ge Modimo a kile a fodiša monna motheong A mo fodišitše go ona, O swanetše go fodiša yo motee yo a latelago ge a etla lefelong leo. Ge A se a dira, O dirile phošo ge A dirile nako ya mathomo ge sephetho se be se swanetše go dirwa.

⁵¹ Ge A ka tsoge a dira sephetho, O swanetše go dula le sona ka mehla. Ge A sa dire, O dirile sephetho sa phošo gona. Le a bona? Gomme ke mang a ka rego Modimo o dirile sephetho sa phošo? Le a bona? Re ka se kgone go bolela seo. Kafao Modimo o swanetše go dula le sephetho sa Gagwe ka mehla. Kafao ge A se dira, ke seo.

⁵² Kafao O rile, “Ikaroganye wenamong go tloga go moloko ohle wa gago, se sengwe le se sengwe, gosedumele gohle goo go tšwago tlase Babilonia godimo fale.”

⁵³ Mokgatlo wa mathomo wo mogolo ka lefaseng e be e le Babilonia, ge o kopantše ditoropokgolo tšohle go loba go toropokgolo e tee ye, sona sekai, diism tšohle tše le dilo tše mpsha di bonwago lehono. Ge o kile wa bala *Bobabilonia ba Babedi* ba Hislop, le go ya pele, le go ya morago ka go Genesi, o tla hwetša gore Genesi ke mathomo, peu, o bona diism tšohle tše le dilo, thwi di beilwe thwi ka fale.

⁵⁴ Le a bona, Bafarisei ba dikgorothwane beng bao ba tšwago tlase fale, go tšwa go mosadi yola ka yona medu ya go nyaka tsebo le go ya pele, e tla thwi go theoga mo matšatšing a Jesu. Bafarisei

ga se ba dumela go Moya goba selo gape, gomme ba šitišitše Jesu. Jesu o rile, "Ba tlogeleng ba nnoši. Ge sefofu se hlahla sefofu, bobedi di wela ka mokoting. A nke . . ." O ile thwi pele a rera, le go fodiša balwetši, le go dira mehlolo, gomme feela go swana. Ga se ya ke e Mo emiša, ka baka la gore O be a le Lentšu. Lentšu le ya thwi pele, go sa kgathale gore go direga eng.

⁵⁵ Kafao re hwetša dilo tšela di eya pele, gomme mafelelong di tla go khukhuša fa mo matšatšing a mafelelo. Bjalo ka ge Jamboro le Janne ba emelane le Moshe, kafao go tla ba selo sa go swana.

⁵⁶ Bjale, karogano moka go tloga go gosedumele gohle. Gomme, eelewang, Abraham mopatriaka ga se a ke ka go felela a šegofaditšwe ka botlalo go fihla a obametše tlwa se Modimo a rilego dira. Gomme re ka se tsoge, ra tsoge, ra tsoge ra šegofala le ge e ka ba mang, le go ba le ditšhegofatšo, go fihla re obamela se Modimo a rilego dirang.

⁵⁷ Selo se sengwe ke nyakago le se hlokomele mo ka go tema ya 12, gore kgwerano e be e le ntle le mabaka. Go be go se peelano efe go yona. "Ke dirile," e sego "ge o." Go be go se bo ge go yona. "Ke šetše ke e dirile." O fa Abraham kgwerano, ntle le mabaka.

⁵⁸ Gomme bjale tsebang, ka go kgwerano ya Adama, e be e le, "Ge o sa kgwathe mohlare wo, gona Ke tla dira *bjalo le bjalo*. Eupša ge o dira, gona Ke tla swanela go dira *bjalo le bjalo*." Le a bona, yeo e bile le molao o gomaretše go yona.

⁵⁹ Eupša ka go kgwerano ye, "Ke šetše ke go dirile tatago ditšhaba tše ntši." Gomme O šet-... Yohle ke ntle le mabaka. Kgwerano e ka mogau ka go felela, feela ka mogau ka go phethagala. Selo se nnoši ba ilego ba swanela go se dira go lota kgwerano ye e be e le go dula le go dula ka nageng; gomme tšhegofatšo ye nngwe le ye nngwe, e bego eya le kgwerano, e be e na le bona. Selo se nnoši ba bego ba swanetše go se dira e be e le go dula ka nageng yela. Bjale re hwetša, ge ba ile tlase ka Egepeta, ba lahlegetše ke tšhegofatšo ya bona, eupša e sego kgwerano ya bona. Kgwerano e be e sa le fao. Ba lobile tšhegofatšo, eupša e sego kgwerano ya bona, gobane kgwerano ya bona e be e le mogau, ntle le mabaka.

⁶⁰ Gomme ka go—ka go Ekisodo, tema ya 19, Ek-... Israele e dirile se sengwe sa dilo tša yona tša go tlalelwu kudukudu tše o kilego ya di dira, e bile ge e ganne mogau le go amogela molao. Lebelelang se mogau o se dirilego. Mogau o ile wa swanela go ba fa molokolli, o ile wa ba fa moperfeta, ka Pilara ya Mollo go mo hlatsela ka Lentšu le le tiišeditšwego, e be e le kwana ya sehlabelo. Mogau o be o ba file tsošeletšo ye kgolo. Mogau o be o ba tlišitše go kgabola, wa bula Lewatle le Lehubedu, wa ba tliša go kgabaganya leo. O ba lokolotše ka maswao le matete, bohle ka mogau. Eupša ba nyakile se sengwe gore ba kgone go itirela ka bobona maina a magolo.

⁶¹ Bjale, ge seo e no se be batho lehono, e no ba selo sa go swana. Ba swanetše go ba, motho o swanetše go itsentšha yenamong ka go yona felotsoko. Gomme fao ke moo gore Israele e dirile phošo ya yona ye kgolo, ge e ganne mogau le go tšea molao, sebakeng. Gomme . . . Golebjalo, eupša kgwerano ye A e dirilego le bona e be e sa no ba ntle le mabaka. È sa le selo se se swanago lehono, re a se hwetša.

⁶² Abraham, gona, morago ga ge a bile le maemo a a filwe go yena, o thomile leeto la gagwe, a eya pele. Bjale re hwetša o sepeletše ntle.

⁶³ Gomme ka go tema ya 13, mafelelong o tla lefelong la go obamela ka botlalo go Modimo. Bjale re a hwetša, ka go tema ya 13, gore Loto . . . Sa pele, o tšere tatagwe, gomme mokgalabje ka mehla o be a le mohuta wa ka tseleng. Gomme o lekile go hwetša sehlopha se gogoba mmogo le yena. Gomme ge o dira seo, fao ke mo o e hweditšego. Modimo o rile, “Arogana.”

⁶⁴ “Gabotse, ke tla go botša, ga ba dumele tlwa, eupša . . .” Gona eya kgole le yona. Seo ke selo se nnoši, e no dula kgole le sona.

⁶⁵ Gomme ka gona mokgalabje, mafelelong o, morago ga ge ba mmolokile, nako yeo, Loto o bile mo—mo moriri ka go dipisikiti, bjalo ka go bolela. Re hwetša gore o thoma go popoduma. Gomme bobedi bá humile, gomme ba bile le bontši go ya mmogo le bona. Gomme re hwetša gore Loto o thoma go lwa, badiši ba gagwe kgahlanong le badiši ba Abraham.

⁶⁶ Gomme re hwetša gore ga se A ke, Modimo o be a se a hwetša potego ka botlalo ka . . . -aham, Abraham, go obamela se A mmoditšego go dira, go ikaroganya ka go felela yenamong go tloga go moloko ohle wa gagwe, go tšwa go batho ba gabon bohle, le go Mo hlankela.

⁶⁷ Kafao re hwetša gore, Modimo a bolela le Abraham fa, mo aletareng, gomme o be a mmoditše a dire eng. Mafelelong, Loto, ge go etla potšišo magareng ga Abraham le Loto; e be e le morwa wa ngwanabo Harane, gomme ba . . . E tla ba motlogola wa gagwe. Gomme mafelelong o rile, “A re . . . Rena re baena bjale. Re ka se be le dintwa tše di itšego magareng ga rena. Bjale wena, ge o eya bohlabela, ke tla ya bodikela. Gomme ge o eya bodikela, ke tla ya bohlabela. Bjale o no ikaroganya renabeng, gomme re ka se . . . Go ne sekgorba se sentši fa bakeng sa rena bohle. Gomme o no ya, o no dira kgetho.” Bjale woo e be e le moya wa kgontha wa Bokriste ka go Abraham, a fa le lenaba kholego ya kgetho. Gomme ka fao o mo dumelitše go tšea tsela ya gagwe.

⁶⁸ Gomme Loto, go swana le ba bantši lehono, o bone sebakabotse. Ge eba a ka tsoge a tloga go ngongosela gola, gobaneng, a ka itirela ditolara di se kae yenamong, a ka no ba monna wa motsebalegi. Kafao o lebeletše tlase go leba Sodoma.

Gomme e be e le naga ya meetse gabotse, le toropokgolo ye kgolo, le intasteri ye kaone ya letswai, le go ya pele. Bona, ba bile le diromelwantle go tšwa fale. Gomme—gomme ka gona, gape, go be go tletše nako ye kgolo, basadi ka pente yohle ya Isebele wa bona le se sengwe le se sengwe, feela nako ye kgolo. Mosadi wa gagwe o bile mohuta wa go ikwela gannyane ka tsela yeo, le yena, ka gore, re hwetša ntle, morago ga ge a bile meyara tlase kua gore o bile mohuta wa—yena o bile mohuta wa go rata tsela ya batho. Gomme seo ke selo se nnoši o swanetšego go se dira, ke go hlakahlakana le se sengwe. Le a bona?

⁶⁹ Modimo o nyaka o ikaroganye wenamong, gomme—gomme o ye kgole kudu go tloga go tšona dilo go fihla ebile o sa di bone le gannyane. Gore, o nyaka go bona selo se tee, yoo ke Yena le seo A se tshepišitšego.

⁷⁰ Eupša Mdi. Loto, o bile mohuta wa go e rata. Gomme, ntle le go kamaka, o be a no re, “Morategi, bjale ke be ke sa no ba tlase, gomme o lebelela ka fao basadi ba aparago fase kua, le go lebelela basetsana bale. Lebelela ka fao basetsana ba rena ba aparago. Kafao a ga o nagane gore ke bona ba sebjalebjale kudu?” Oo, nna! Ge re se na le thwi morago go Sodoma ye nngwe, ga ke tsebe gore ka baka la eng. Fao re a hwetša.

⁷¹ Eupša Abraham o dutše le tshepišo. Ka gona re hwetša ntle, ge e eya pele, gomme... ge ba ikarogantše bonabeng, le Loto. Gomme Abraham o tšere mabala a go šokiša, tsela ye nnyane, a dula godimo moo go bego go se phulo ye ntši kudu go dikgomo tša gagwe. Gomme, eupša, o be a loketše go tšea tsela, ka gore Modimo o mmeile ka nageg yeo, gomme fao ke mo a bego a nyaka go dula. Komana go e tšea.

⁷² Bjale ge mafelelong, a obametše Modimo ka bottlalo, ge mafelelong a obametše Modimo go bottlalo bja yona, go ikaroganya yenamong ka go felelela, e bile nako yeo Morena a bonagetšego go yena gape. Go fihla a dirile seo, Morena o dutše kgole le Abraham. Eupša ge a obametše ka bottlalo, gona Loto.... Modimo o bonagetše go yena, O rile “Abraham, phagamišetša mahlo a gago godimo. Lebelela bohlabela, lebelela bodikela, lebelela leboa, lebelela borwa, yohle ya yona ke ya gago.” Amene. Bjale, ke rata seo.

⁷³ Gomme, le a tseba, seo ke se sengwe go swana le ge ke phološwa. Ka mehla ke be ke ekwa ka Modimo e le Modimo yo mogolo. Gomme, le a tseba, ge ke phološwa, ke... Yo mongwe o rile, “Bjale sohle o swanetšego go se dira ke go tšoena kereke, gomme bea leina la gago godimo ga boingwadišo bja kereke ye mo kerekeng ya Baptist. Seo ke sohle o swanetšego go se dira.”

⁷⁴ Eupša, le a tseba, letšatši le lengwe ke bone gore ke be ke le mojabohwa go se sengwe, gore ke—ke—ke nyakile go lebelela ka yona le go bona se ke bilego le sona. Le a tseba, ke no ba ka

tsela yeo. Boka mo—mo mokgoba wo mogolo, ke wa gago, le—le se sengwe le se sengwe ka fale ke sa gago.

⁷⁵ Ga—ga o tsebe se o nago sona go fihla o eya go lebelela go kgabola Beibele, go hwetša ditshepišo. Amene. Ba tla go thibela go tšona ge ba ka kgona; eupša ke tša gago. Tshepišo ye nngwe le ye nngwe ke go Abraham le go Peu ya gagwe ka morago ga gagwe. Amene. Tshepišo ye nngwe le ye nngwe ye Kgethwa ka go Lentšu ke ya Abraham le Peu ya gagwe, gomme o mojabohwa wa yona. Mojabohwa! Oo, nna! Ke rata go lebelela go kgabola go bona se ke nago naso. Ge yo mongwe a mpha se sengwe, ke rata go se hlola. Gomme ke rata go lebelela ka Beibele le go bona se e lego sa ka. Peu ye nngwe le ye nngwe ya Abraham e swanetše go dira seo, ge o tswalwa gape, wa tlatšwa ka Moya wa Modimo, le Moya wo Mokgethwa godimo ga gago, o mojabohwa go ye nngwe le ye nngwe ya ditshepišo tšeо.

⁷⁶ Le a tseba, go swana le ge ke boletše, mokgoba wo mogolo, ka gore re kolobeletšwa ka go mokgoba woo. Ka Moya o tee bohle re kolobeletšwa ka Mmeleng o tee, gomme Mmele woo ke Kriste, e lego Peu ya Bogosi ya Abraham, le bajabohwa go se sengwe le se sengwe seo se lego ka go yona. Amene. Se sengwe le se sengwe seo se bego se le ka go Modimo, Modimo o se tšolletše ka go Kriste; se sengwe le se sengwe seo se bilego ka go Kriste, O se tšolletše ka go modumedi. Amene. Modimo ka godimo ga rena, Modimo le rena, gomme Modimo ka go rena! Se sengwe le se sengwe, tshepišo ye nngwe le ye nngwe ka go Puku, ke ya gago ge o ka kgona go e dumela, ge o na le tumelo go lekanelo go e amogela le go e dumela.

⁷⁷ Le a tseba, ke lebelela go dikologa, ge nka hwetša se sengwe seo se lego godimo gannyane kudu, ke makala ke eng e lego ka go sona, ke tla ikhweletša llere gomme ka le kgoromeletša gohle, gomme ka fela ke namela go fihlela ke fihla go sona. Yeo ke tsela, tshepišo ka Beibeleng, ge e ka ba eng e bonala boka e mohuta wa go makatša go nna, ke no tšwelapele go rapela go fihla ke e fihlelela. Yeo ke phetho. Yeo ke tsela go e dira. Tšwelapele o rapela, tšwelapele o swareletše, o namela godimo, o dumela, go fihla o... O mojabohwa wa yona, o na le tshepišo go yona, gomme o na le tokelo go yona, gomme, “Kgopelang gomme le tla amogela, ka gore dilo tšohle di a kgonega go bona ba ba dumelago.”

⁷⁸ Bjale re hwetša gore Abraham o sepetše go kgabola naga. Modimo o mmoditše, o rile, “Sepela go kgabola naga, lebelela godimo ga yona. Se sengwe le se sengwe ka mo ke sa gago. Nthatana ye nngwe le ye nngwe ya yona ke ya gago yohle. Yohle ke ya gago.”

⁷⁹ Bjale re hwetša gona, gore, gore ka go tema ya 14 ya Ekisodo bjale goba... tema ya 14 ya Genesi, ntshwareleng. Ka go tema ya 14 ya Genesi, Abraham le Loto ba be ba arogane, gomme

mafelelong Loto o tsene ka bothateng tsoko. Gomme ka mehla o tla dira, ge o ikaroganya wenamong go tloga go badumedi, o tla tsena bothateng. Re hwetša gore dikgoši di be di šetše di hlakanel a gomme ba dirile ntwa. Gomme ba theogile gomme ba tšere Sodoma, ba tšere Gomora, ba tšere dikgoši tša bona tšohle tša masodi le melala, le se sengwe le se sengwe, gomme ba tšere Loto. Gomme feela batho ba se nene ba phonyokgile ka dithabeng.

⁸⁰ Gomme ge ba dirile, yo mongwe yoo a phonyokgilego o tlie le go botša Abraham Mohebere, o boletše, gore, "Sodoma e wele, le Gomora, gomme ba tšere dikgoši tša bona, le—le go ya pele, gomme ba tšere batho bohle, le dijo tša bona le se sengwe le se sengwe ba bilego le sona. Gomme ba tšere Loto le mosadimogatša wa gagwe, le barwedi ba gagwe, basadi bohle, gomme ba ile pele ka yona."

⁸¹ Bjale, Abraham, šetšang moy a wo wa Bokriste o hlomara bakeng sa ngwanabo. Ebile le seo, go le bjalo, Loto a kgelogile, a ile morago, efela Abraham o mo ratile. O tšvetšepele a hlomara.

⁸² Go no swana le Jesu, ka go Lebaka la Kereke ya Laodikia. Efela, ba Mmeile ka ntle ga kereke ya bona. Gomme O be a le ka ntle, a kokota, a leka go tsena morago ka gare. [Ngwanešu Branham o kokota godimo ga phuluphithi—Mor.] Ge A ka no hwetša yo mongwe go bula mojako gore A kgone go tsena!

⁸³ Fao ke moy a wola wa Abraham, le a bona, go ya ka morago ga wa gagwe yo a welego, ngwanešu wa go goboga. Gomme o ile ka morago ga gagwe, gomme o tšere bahlanka ba gagwe ba makgolotharo gomme a ba hlama. Gomme o kopane le yena tlase ka Dane; bjoo ke bofelo bja go tsenelela bja Palestina fale. Gomme o kopane le yena kua, le go ikaroganya yenamong bošego, le go hlomara le go lwantšha madira fase, le go fenya dikgoši, le go ba gagara, le go tliša morago bohle bao ba tšeetšwego ntle.

⁸⁴ Hlokamelang, ge a etla morago, a seswantšho se sebotse mo. Ke ka lebaka leo ke no no ratago mohuta wa go no lebelelapelle se gannyane nthatana, kafao re hwetša... pele ke fihla go sehlogo sa ka sa *Jehofa-Jireh*. Ge le ka hlokomela Abraham a tliša morago tšohle tše di bego di lahlegile, ngwanabo wa go hlahlatha le bana, ge a ba tlišitše morago, dikgoši di tlie ntle go mo gahlanetša.

⁸⁵ Gomme Melekitsedeke o tlie, "E bego e le Kgoši ya Salema, Kgoši ya khutšo, Kgoši ya toko, Kgoši ya Jerusalema; ntle le tate, ntle le mme, ntle le mathomo a matšatši, ntle le mafelelo a bophelo." Melekitsedeke o kopane le yena mo go pol... go tšwa polaong ya kgoši, go Yena mopatriaka Abraham (Bahebere 7) o kopane le Monna yo gomme a lefa sa lesome, karolo ya lesome. A Monna yo mogolo yo a swanetšego go be a bile! Ke mang le naganago e be e le yena? "O be a se ne tate. O be a se na le mme.

O be a se a tsoge a thomo.” Gomme e ka ba Mang A lego, O sa phela. “Ga se nke A fela. Kgoši ya Salema, Kgoši ya khutšo!” Oo, Monna yo mogolo yo e be e le Mang?

⁸⁶ Gomme hlokamelang ke sekai sefe re se hwetšago fa. Ka morago ga ge ntwa e fedile, ka morago ga mo—mo modumedi wa kgonthe a lwele le lenaba, a thubile methaladi le go leka go swara ngwanabo, Peu ya kgonthe ya Abraham e tliša morago ngwanešu yola wa go hlahlatha, Melekitsedeke o a tla gomme a direla beine le borotho, selalelo, a efa selalelo ka morago ga ge ntwa e fedile, o diretše selalelo go yena ka morago ga ntwa.

⁸⁷ Sekai se sebotse kudu sa ge ntwa e fedile, mo lefaseng, diphenyo di thopilwe. Jesu o rile, “Ba tla se ja ka boswa ka Mmušong wa Tate,” morago ga ge bahlahlathi ba tlišitšwe morago. Ka gona selo sa pele re se dirago ge re eya ka gare, morago ga ge ntwa e fedile, ke go dula fase tafoleng ka Mmusong wa Modimo. Gomme fare bale ba lwelego, le go dula fase le go fenyia, ba tla apešwa ka toko ya Kriste, gomme ka gona gape ba tsea borotho le beine, ka Mmušong wa Tate ka lehlakoreng le lengwe. A seswantšho sa kgonthe se e lego, sa Abraham a eya ntle le go hwetša Loto le go mo tliša morago.

⁸⁸ Bjale re hwetša gona, gore ka go tema ya 15, re hwetša se sengwe sa maemo kudu mo. Ke—ke mohuta wa go rata se, gabotse kudu, go boneng yo Abraham a bego a le bjale, gomme Abraham le Peu ya gagwe ka morago ga gagwe. Re hwetša fa, gore ka morago ga ge Abraham a dirile dilo tšohle tše kgolo tše; a dumela Modimo, a swareletše go tshepišo, a ikaroganya yenamong, le gohle mmogo go latela tsela ya—ya go tšwetša pele melao ya Morena; re hwetša gore Modimo o bonagetše go yena mo aletareng. Gomme Abraham o Mmotšišitše potšišo, o rile, “Bjale, ke mang mojabohwa wa ka eupša—eupša Eliasara yo wa Damaseko? Gomme bjale O ntshepišitše Peu. Gomme ke—ke nyaka O dire se sengwe; ke nyaka O tiišetše tshepišo ye go nna.”

⁸⁹ Gomme Modimo o boletše gore O tla e tiišetša go Abraham, a tiišetša kgwerano ye A e dirilego gare ga Gagwe le Abraham. Bjale O ya go mo fa leswao gore e ya go ba therešo. Gore, le ge a tšofetše, a ka ba masomeseswai tlhano bjale, eupša go le bjalo O ya go netefatša go yena, ka leswao, gore O ya go boloka kgwerano yela.

⁹⁰ Oo, ke thabile kudu gore Modimo ka mehla o re fa maswao, gobane O... Re swanetše go tseba, lehono, gore iri ye bjale re phelago ka go yona, fao go swanetše go ba leswao lefaseng ka nako ye. Re swanetše go lebelela leswao lela. Modimo ga a ke a dira eng kapa eng ntle le pele go fa batho leswao le tshebotšo. Gomme leswao la mmapale le latelwa ke segalontšu, gomme segalontšu ka mehla ke segalontšu sa Lengwalo.

⁹¹ Bjale O ya go tiišetša kgwerano go Abraham, goba Abram, gabjale. Gomme O rile, “Tsea sethole se seswa.” Bjale, elelwang,

go na le namane ya tshadi. "Gomme tsea pudi ya mengwaga ye meraro ka bokgale. Ye nngwe le ye nngwe e swanetše go ba mengwaga ye meraro ka bokgale." Hlokamelang, sethole sa mengwaga ye meraro bogolo, tshadi; pudi ya mengwaga ye meraro bokgale, tshadi. "Gomme kgapa," tona. Ye nngwe le ye nngwe ye meraro, bogolo bja mengwaga ye meraro, gomme go ne tše tharo tša tšona. Tharo; tshadi, tše pedi tša ditshadi, le ye tona. Le a bona? Mengwaga ye meraro bogolo, sehlabelo sa go hlweka, kwana . . . sethole, pudi ya mengwaga ye meraro bogolo, gomme morago kgapa.

⁹² Ge le ka hlokoma, se sengwe le se sengwe fao se aga ka go leswao. Gomme bjale ga ka swanelo go rera thuto go tšwa sefalenfa, gomme ke ne kgonthe seo se kgauwi go lekanelo le kgoni go bona. Hlokamelang. Gomme o tšere tše pedi, dinonyana tše pedi. "Leebana le tee le mokurwanyane o tee," e lego lapa la go swana, leebana le mokurunyane.

⁹³ Bjale o phaphologantše pudi...nku ka bobedi. O phaphologantše kga—kga kgapa le pudi, le tše dingwe. O di arogantše, a di phaphologanya ka seripa, gomme a di robatša fase. Eupša maeba, o...le leebana, ga se a ke a a aroganya. Ao e be e le, ka nnete, e ka ba mang a tsebago Lengwalo, o tseba gore yeo ke phodišo Kgethwa. Le a bona, ke bobedi bja dikgwerano. Gomme ka fao re hwetsa gore, o a beile ka gare. Phodišo ka mehla ke tumelo ka go Madi a tšholotšwego, ka mehla. Gomme kgwerano ya kgale e bile le phodišo Kgethwa, ke bontši gakaakang go fetiša Kgwerano ye Mpsha e nago le yona? Le a bona? Ge kgwerano ya kgale e e tšweleditše, go reng ka ye Mpsha, mola, "Ke kgwerano ye kaonana kudu, go bolela ka tše kaonana, dilo tša godingwana, dilo tše kgolwane, dilo tše kaonana?" Kgwerano ye Mpsha!

⁹⁴ Bjale re hwetsa ka go se, gore Abraham, ge a dirile se, gona hlokamelang se se diregilego. Bjale ye kgolo še, ya go ikgetha ntlha. Ga ke nyake le—le—le e foša. Tiišetšo ya kgwerano, ka mantšu a mangwe, ke tshepišo, gore, "Ke na le therešo go se Ke se dirago goba se Ke rego Ke tla se dira," Modimo o e netefaditše go Abraham.

⁹⁵ Gomme o tšere dihlabelo tšela le go di bolaya, le go di bea mafelelong, mmogo, ge a di beile fase; gomme a hlapetša dinonyana go tloga go tšona, kafao dinonyana di be di sa tle tlase godimo ga nama ye mpsha, go fihla letšatši le be le dikela, ka mantšiboa. Gomme ge letšatši le tlile fase, goba le be le eya tlase, fa O bontšitše Abraham se A bego a eya go se dira ka moso, se se bego se yo direga.

⁹⁶ Hlokamelang, O boditše Abraham: Selo sa pele a se bonego e bile letšhogo la leswiswi le etla godimo ga gagwe. Sa pele, boroko bjo boima ka kgonthe bo wetše godimo ga gagwe. Bjale, boroko bjola bo emetše lehu go batho bohle. Motho yo mongwe

le yo mongwe o swanetše go hwa; lehu go batho bohle. Boroko bjola bo tla godimo ga gagwe; gomme pele ga ge bjoo go ile bo—bo—bo boso bja go tšoša bja kgonthe; gomme morago go tšwile leuba la mollo; gomme morago Seetša se sennyane sa go tuka se ile magareng ga kgwerano, se ile gare ga dihlabelo, se se arogantše. Bjale seo se ra eng? Go ra gore motho yo mongwe le yo mongwe o swanetše go hwa; gomme ka kgonthe, morago ga fao, o swanelwa ke go ya heleng; yeo ke nnete, ka leswiswing, leswiswi la kgotlombo, a arogane go tloga go Modimo; eupša Seetša se tlile ka gare, gomme se ile magareng, go aroganya dihlabelo tše. Ge le kwešiša, re... Kgwerano yela!

⁹⁷ Go swana le rena Maamerika, re dira bjang kgwerano? Gabotse, selo sa pele re se dirago, re re, re ya go dira mohuta tsoko wa mošomo goba se sengwe, ka mehla re ya ntle le go ja; gomme ra dula fase, ra bolela lebakana, gomme morago ra fa dipego tša rena; gomme morago ra šikinyana diatla tša rena seng. Re re, “Šikinyana go yona!” Yeo ke kgwerano ya rena. Yeo ke tshepišo ya rena.

⁹⁸ Bjale, ka Japane, le tseba ka fao ba dirago kgwerano ka Japane? Le bona ba na le se sengwe go ja; morago ba topa legapano le lennyane la letswai, gomme ba le tšhelana ka letswai seng sa bona. Yeo ke tiišetšo ya kgwerano.

⁹⁹ Re šikinya diatla, ra re, “E tswaletšwe, mošemane wa kgale. Ke a e dumela. Ke tla dula le wena. Ke tshepišo.”

¹⁰⁰ Ka Sejapane, Japane, ba tšhelana ka letswai seng. “E tswaletšwe, mokgotse. Bjoo ke bofelo bja yona.” Bjoo ke bofelo bja phapano yohle gona. Bona, ba dirile kgwerano, ba e tiišeditše, ka go tšhelana ka letswai seng sa bona.

¹⁰¹ Eupša ka matšatšing a kgale... (A nka kgona go ba le ye nngwe ya tše?) [Ngwanešu Branham o topa seripa sa pampiri—Mor.] Ka matšatšing a kgale, še tsela ye ba dirilego kgwerano. Re thadile kwano, gomme re tšere kwano le go e ngwala ntle ka mokgwa *woo*. Gomme ka gona re bolaile phoofolo, sehlabelo; ra e aroganya, ra e robatša go swana le ge e be e le nakong ya Abraham fao. Gomme morago re eme magareng ga kgwerano ye, wena le nna, gomme re dirile keno go Modimo. “Ge re šitwa go boloka kgwerano ye, a nke re be bjalo ka sehlabelo sela sa go hwa seo se hwilego lefelong la rena. A nke madi ale a sehlabelo sela a arabe godimo ga rena. A nke re hwe lehu la go swana, ge re šitwa ke go boloka kgwerano.”

¹⁰² Ka gona yohle e thadilwe ntle, goba e ngwadilwe godimo ga seripa sa lengwalo go swana le *leo*. Morago le kgeitswe ka bobedi, ka mokgwa *woo*. [Ngwanešu Branham o kgeila seripa sa pampiri ka go tše pedi—Mor.] Bjale o tše seripa se tee, gomme ke tše seripa. Gomme bjale, le a bona, o ka se dire yeo tše pedi le gatee, gagolo ge e ngwadilwe godimo ga mokgophwa nku. Le a bona, o ka se kgone go e dira tše pedi le gatee. Yeo e swanetše tlwa

go sepelelana le *yeo*, go e dira bjalo. Gomme ka gona ge re etla mmogo, ke rwala karolo e tee, o rwele karolo ye nngwe. Gomme ka gona ge re etla mmogo, gomme kgwerano ye e swanetše go dirwa, gomme dikenno tša rena di swanetše go patelwa, gona ntsekana ya ka ya pampiri e swanetše go sepelelana tlwa le ntsekana ya gago ya pampiri, gomme ka fao ke wena o nago le nna ka go kgwerano.

¹⁰³ Se Modimo a bego a se bontšha fale O be a dira, gore Modimo ka Boyena o be a theogela tlase go dirwa nama, gomme O be a eya go ba ka go kgwerano. Gomme Modimo o tšere Kriste, Moya; Modimo Jehofa o tšere Kriste, mo sefapanong, gomme O Mo kgeitše ka bobedi. O ripile soulo ya Gagwe gomme a e bea Godimo, gomme o tšere mmele gomme a o bea ka lebitleng. Gomme a phagamiša mmele, mo mosong wa tsogo; le go romela morago Moya wo o bego o le godimo ga Gagwe, go ba ka Kerekeng. Gore, tiišetšo ya go swana mo matšatšing a a mafelelo, “Jesu Kriste wa go swana maabane, lehono, le go ya go ile,” moo kgwerano yela ya go swana e tla bago ka go batho.

¹⁰⁴ O ya go E hwetša bjang ka thuto? O ya go E hwetša bjang ka tsela efe kapa efe ntle le tiišetšo ya yo a phelago, Jesu Kriste yo a tsogilego yoo a tsošitšwego go tšwa bahung gomme a dutšego Bogošing Godimo, bošegong bjo? Ka Moya wa go swana o bego o le godimo ga Gagwe, o godimo ga Peu ya Bogoši ya Abraham, mo matšatšing a mafelelo, go tiišetša le go netefatša gore O a swana maabane, lehono, le go ya go ile. Amene. Go go dira o ikwele bodumedi, a ga go? Šeo yona, ka go kgwerano ya tlwa, “Ngwala kgwerano ya Ka godimo ga dipelo tša bona.” Jesu o rile, “Dilo tše Ke di dirago le tla di dira le lena.”

¹⁰⁵ Ge re etla godimo fa go Sodoma, mo metsotsong e se mekae, šetšang ka fao go lego, ka fao go diregago fale, tlwa ka fao tshepišo e lego ya letšatši la mafelelo le se A tla go se dira.

¹⁰⁶ O be a e tiišetša, go laetša gore O... O kgeitše mmele wa Jesu go arogana, a tsea Moya, o phagamišeditše mmele godimo go seatla se setona sa terone ya Modimo; le go romela tlase karolo ye nngwe, karolo ye A e kgeitšego, Moya godimo ga rena, wo o bitšwago Moya wo Mokgethwa. Gomme bjona Bophelo bjo bo bego bo le ka go Kriste bo ka go wena, bjoo bo laetšago gore Ke Molopolodi wa gago. Ole beile go Modimo, gomme bjale re barwa le barwedi ba Modimo, ka Moya wa Kriste. Amene.

¹⁰⁷ “Mediro ye Ke e dirago le tla e dira le lena. Ye megolwane go feta wo le tla e dira, gobane Ke ya go Tate wa Ka.” Amene.

¹⁰⁸ Moya wo o bego o le ka go Yena o godimo ga gago, Bophelo bjo Bosafelego. Yena ke mofi wa Bophelo bjo Bosafelego. Yena ke Molopolodi, go tliša morago seo se welego ka go weng, ka molokong wa motho, go se tliša morago go Modimo. Gomme Moya wo o bego o le ka go Kriste o ka go lena. Gomme ge moya wa—wa Dillon o be o le ka go nna, ke be ke tla ba le dithunya.

Ge moya wa motaki o be o le ka go nna, ke tla penta diswantšho.
 Ge Moya wa Kriste o le ka go lena, mediro ya Kriste le tla e dira.
 Amene. Yeo ke nnete. Bophelo bjo bo bego bo le ka go Yena bo
 ka go lena.

¹⁰⁹ Go fetišetša bophelo go tšwa go e ka ba eng go ya go selo se
 sengwe. Ge o ka kgona go tšea bophelo bja—bja lefodi gomme wa
 bo bea ka go morara wa legapu, o tla enywa mafodi, tlwa. O tšea
 bophelo go tšwa mohlareng wa moperekisi, gomme wa bo bea ka
 mohlareng wa pšere, o tla enywa diperekisi, ka gobane bophelo
 bjo bo lego ka mohlareng bo fa bohlatse bja bjona.

¹¹⁰ Gomme fao ke ka mokgwa wo Peu ya Bogoši; ka Isaka go
 tlilego peu ya tlhago, ye e Bo gannego. Ka sefapanong, go tloga
 go Efuraimi go ya go Manase, e be e fetišeditšwe, tšhegofatšo
 go tšwa seatleng se setona go seatla se setshadi; goba seatla se
 setshadi ke le letshadi, yo monyenyan go ya go yo mogologolo;
 go kgabola fale go retologile seemo ka moka go tloga go peu ya
 tlhago ya Isaka, ye e gannego Kriste, le kereke ya tlhago lehono
 ye e sa Mo ganago.

¹¹¹ Eupša ya semoya, Peu ya Bogoši ya Modimo ye e dumelago,
 Peu ya Bogoši ya Abraham ye e dumelago Lentšu le lengwe le le
 lengwe la Modimo, go na le tiišetšo ya wa go phela, Jesu Kriste yo
 a tsogilego ka go bona. Amene. Amene. Oo, nna! Le a bona, selo
 sa go swana se bilego, Kereke ka moka e swanetše go tswalana.

¹¹² Ge e be e kaiwa ka go peu ya tlhago, lebelelang, Isaka le
 Rebeka ba bile bomotswala wa pele, leloko la madi, botate ba
 go swana; le a bona, botate e be e le barwarre, o ba dirile
 bomotswala ba madi, monyalwa le monyadi.

¹¹³ Gomme ka go Adama le Efa, bohole e be e le Adama, sa
 mathomo. Modimo o tšere kgopo go tšwa lehlakoreng la gagwe
 gomme a dira mosadi, gomme O tšere moya wa bosadi go tšwa
 go Adama le go o bea ka go mosadi.

¹¹⁴ Ka fao ge mosadi a dira bona, go na le sengwe . . . go na le
 phapogo felotsoko. Gomme ge monna a nyaka go ba mosetsana
 yo mogolo, fao go na le selo se sengwe sa phošo felotsoko.
 Modimo o dirile monna gomme a mo apeša bjalo ka monna, le
 mosadi go swana le mosadi. O dula a dutše ka tsela yeo. Amene.
 Ge o ba bona ba dira se sengwe gape, go na le se sengwe sa
 phošo. E fapošitšwe. Gomme selo ka moka se fetogile sehlopha
 sabaarogi. Yeo ke nnete tlwa. Morafe ka moka, moloko ka moka,
 ke, “selo ka moka ke sešo sa go bola,” bjalo ka ge Beibele e
 boletše. Ga go go hlaka le ge e ka ba kae. Le a tseba yeo ke
 therešo. O ka se hwetše le gatee e ka ba—e ka ba mang magareng
 ga bona ntle . . . Eupša eya ntla mokgotheng, go thata go hwetše
 monna wa kgonthe; bonkatshadi bjalo ka ge nkile ka ba bona.
 Gomme basadi, ba apara marokgo, ba kota moriri wa bona,
 ba apara setlotšamolomo, ba kgoga disekerete, ba leka go ba

monna. O nyaka go ba monna bakeng sa eng? O swanetše go ba mohumagadi.

¹¹⁵ Ke bone leswao, le rile, “Ditafola tša bahumagadi,” ka pareng.

¹¹⁶ Ke rile, “Ga se nke wa ba le moreki.” Mohumagadi a ka se ye lefelong le le bjalo. Aowa, mohlomphegi. Aowa, mohumagadi a ka se ke. Mosadi a ka no, eupša e sego mohumagadi. A ka se ye ka lefelong le le bjalo. Eupša ke lena bao, le a bona.

¹¹⁷ Modimo o arogantše, a ripa. Le a bona, Mmele, Monyalwa wa Kriste, o swanetše go tla morago thwi go mathomo. Bjale Efa o be . . .

¹¹⁸ Efa e be e le eng? Yena le Adama ba be ba swana. Ba be ba bitšwa Adama. Ba be ba le moyo. Ge A bopile motho, lekga la mathomo, O mo dirile ka seswantšho sa Gagwe Mong. Gomme Modimo ke Moya. “Ka seswantšho sa Modimo O mo hlotše, monna le mosadi O ba hlotše.” O be a . . . gomme ka gona go le bjalo go be go se motho wa go lema mobu. Ka gona Modimo o bopile motho go tšwa leroleng la lefase gomme a bea moyo wo wa bobedi ka go yena, gomme yoo e be e le Adama wa pele.

¹¹⁹ Ka gona ge A arogantše Efa go tloga go Adama, Efa o wele ka gosedumele Lentšu. Yeo ke nnete. Fao ke mo kereke e paletšwego lehono, gosedumele Lentšu!

¹²⁰ Eupša ka go taba ye, go Peu ya Bogoši, e biditšwego, e kgethetšwegopele go ya Bophelong bjo Bosafelego, Peu ya Bogoši ya Abraham, ba dumela Lentšu lela. Ga ke kgathale se se tloga goba se sepelago, ba sega gakaakang, ke mang a bolelago se, seo, goba se *sengwe*, ba beetšwe go Bophelo bjo Bosafelego. Gomme o ya thwi ka go otlologa morago. Yena le Moratiwa wa gagwe, Kriste, ke batee. Bophelo, Moya wo o lego ka go Kriste, o ka Kerekeng. Yeo ke kgwerano ya bona ya Gosafelego, mo. Le a bona? Modimo o tšere Moya wa Kriste, a o kgeila go arogana, kua sehlabelong kua Khalibari; gomme o tšere Moya wola, a phagamišetša mmele godimo le go o bea ka seatleng se setona sa Terone ya Modimo le Bogoši Godimo. Seo, se sengwe le se sengwe ka Legodimong se laolwa ke Yena. Gomme ka gona Moya wo o bego o le godimo ga Gagwe, wa tla morago; Moya wa go swana, e sego Moya wo mongwe, Moya wa go swana o tlie godimo ga Gagwe, go tiišetša kgwerano go Peu ya Bogoši.

¹²¹ Gomme ka matšatšing a mafelelo re swanetše go bona, go ya ka Lengwalo. Gomme pele Monyalwa wa Kriste a ka tsoge a tšeelwa godimo, go swanetše go ba bodiredi bo no tsenelana le bjola tlwa. Amene. Ke thabile kudu go bolela, bošegong bjo, gore ke a tseba yeo ke Therešo. Amene. Go tsenelana, go tiišetša kgwerano!

¹²² O e tiišeditše fale, o mmontšhitše se A bego a eya go se dira, go tiišetša kgwerano. Moithuti yo mongwe le yo mongwe wa Beibele o a tseba ke fao A tiišeditšego kgwerano go Abraham. O be a dira

eng? A bontšha ka go seswantšho, se A bego a eya go se dira, ka dihlabelo tše.

¹²³ Gomme bjale go ba thari, gomme nka se be le nako go arola dihlabelo tše. Ke ya go mohlomongwe go dira seo gosasa bošego, eupša, hlokomelang, go bontšha se bona, se dihlabelo tše di bego di se ra. Eupša, le a bona, O e tiišeditše, go laetša gore ka matšatšing a mafelelo . . .

¹²⁴ Bjale mang kapa mang yo a kilego a bala histori ya kgale, o a tseba gore yeo ke tsela ye ba dirilego kgwerano. Ba e ngwadile, morago ba e kgeitše ka seripa, gomme ba e fane; o tee o tšere seripa, le yo mongwe se sengwe. Ba ile ba swanelo go tla morago, godimo ga sehlabelo, go dira sehlabelo sa bona. Seo ke se Abraham a se dirilego go . . . tlase ka Gerare, le go ya pele, mo a ilego kua, moo ba neetšego aletara . . . ba neetšego sehlabelo sa bona le go dira ditumelelano tša bona, le go e kgeila ka mokgwa woo. Gomme Modimo o dirile selo sa go swana, a bontšha fale gore se A bego a eya go se dira go A . . .

¹²⁵ Potšišo e bile, “E kae—e kae Peu ye O ntshephišitšego? Kae? Ke ya go ba yona bjang? Batho ba a ntshega, ba re, ‘Abraham, tatago ditšhaba, e bile mengwaga ye lesometlhano. Bjale o bogolo bja mengwaga ye masomeseswai tlhano, goba—goba masomesenyane. Ba kae, ba kae, ba kae, ba bakae bana ba gago bohole ba kae? Ke bana ba bakae o nago bjale, tatago ditšhaba?” Le a bona, go dira metlae ka yena. Eupša ga se a tekateka. O dutše thwi le yona. Ba dirile metlae, ba re, “Tatago ditšhaba, bjale a re boneng, ke bana ba bakae o nago nabo ka nako ye?” Le a bona, go nyaka go dira metlae, ka gore o be a swareletše go ditshepišo tša Modimo, a dumela gore O kgona go boloka se A se tshepišitšego. O—O feta go kgona. O . . .

¹²⁶ O kgona go neela sehlabelo sa Gagwe Mong. Ke Yena Jehofa-Jireh. O kgona go fa le go dira tsela bakeng sa se A se tshepišitšego. Gomme O tiišeditše kgwerano go yena ka go mo laetša ka fao A bego a eya go e dira, go tšeeng Kriste le go kgeila Bophelo go tloga go Yena, le go bo romela fase ka matsatšing a mafelelo godimo . . .

¹²⁷ Bjale re tla fetša seo ka Lengwalong, beke ye, go netefatša seo go lena, gore kgwerano ye e swanetše go tiišetšwa le Peu ya Bogoši ya Abraham, e lego batho go tšwa go Bantle, e sego Bajuda, “batho go tšwa go Bantle, bakeng sa Leina la Gagwe,” ba e tšeakeng sa Leina la Gagwe. Kereke ye e nago le Leina la Gagwe e tla tla morago ka go Yena, gobane ke yo A lego, Bophelo bja gagwe.

¹²⁸ Theetšang, ge ka Letšatšing la Pentecost, ge Moya wo Mokgethwa o wele ka Letšatšing la Pentecost, Bophelo bo filwe go Kereke. Gomme Kereke yela yeo e ilego thwi ntle le go tšweletša, ba ngwadile ka morago ga Kereke yela Puku ya Ditiro, ya se E se dirilego, ka gobane e be e le Kriste ka go baapostola.

¹²⁹ Bjale Jesu o rile, ka go Mokgethwa Johane 15, “Ke nna Morara, lena le makala.” Bjale, Morara ga o enywa kenywa. Lekala le enywa kenywa. Le fiwa matšato ke Morara. Gabotse, bjale, ge lekabe lela, la mathomo le etla ntle go mohlare wola, le tšweleditše Puku ya Ditiro; ge leo le ka tsoge la Bea ntle lekala le lengwe, e tla ba Bophelo bja go swana.

¹³⁰ Dikgwedi di se kae tša go feta, ke be ke eme le mogwera wa ka yo mokaone, John Sharrit, godimo ka Phoenix. Ke dula ka Tucson, bjalo ka ge le tseba. Gomme kafao ke be ke le godimo ka Phoenix, Ngwanešu John Sharrit, ngwanešu yo mokaone kudu wa Mokriste. Gomme o be a le kgonthé, modiidi ka kgonthé, gomme Morena o mo šegofaditše. Gomme—gomme ge la mathomo ke ile Phoenix, mengwaga ya go feta, o be a se ne bana. Gomme—gomme o be a nyaka bana. Gomme—gomme bona, a diila, a šoma ntle mokgotheng, a phatlola khonkhoriti, e ka ba masomepedi tlhano, disente tše masometharo ka iri. Gomme o tlide tlase kua, gomme a dumela Lentšu le lengwe le le lengwe la Molaetša. Gomme o rile, “A o tla nthapelela?” O ne bana ba bahlano bjale.

¹³¹ Gomme seo, pele ntle le seo, o fa e ka ba tše tharo go iša go tše nne dimilione tša ditolara ngwaga wo mongwe le wo mongwe go taba ya Kriste. Gomme yeo ke nnete. Ke be ke ne naye fa, e se kgale botelele, ke lebeletše godimo ga polasa ya gagwe ya katune. O rekile naga ka moka, a na le makgolo a lesometlhano a Mamexican ba e hlokomela. Gomme o be, mengwaga ye lesometlhano ya go feta a phatlola khonkhoriti, bakeng sa disente tše masomepedi tlhano ka iri.

¹³² O nkišitše mogoleng wo mogolo wa gagwe wa siterase. Gomme ke bone mohlare wa go segiša kudu, fale, nkilego ka o bona bophelong bja ka. E be e le mohuta tsoko wa mohlare, o be o na le mehuta yohle ya kenywa godimo ga wona. Gomme ke lebeletše, gomme o be o na le dinamune, o be e na le diswiri, o be e na le dipapalamone, o be e na le ditanarikisi, o be e na le ditangelo. Ke a nagana go be go le e ka ba mehuta ye senyane ya dikenywa, goba lesome. Gomme ke rile, “Ke mohuta mang wa mohlare wola?”

¹³³ “Oo,” o rile, “yeo e no ba teko ye nnyane, Ngwanešu Branham.”

¹³⁴ Ke rile, “Oo, ke a bona.” Gomme ke rile, “Yohle e phela go mohlare o tee wola?” Ke rile, “Ke mohuta ofe wa mohlare o lego, le go thoma?”

¹³⁵ O rile, “Ke mohlare wa monamune. Woo ke namune ya mokhubo.”

¹³⁶ Gomme ke rile, “Ke yona?” Ke rile, “Baisa ba bangwe ba ba dira eng godimo kua?”

Gomme o rile, “Ba hlomeseditše ka go wona.”

¹³⁷ Ke rile, “Oo, ke a bona.” Ke rile, “Ke a kwešiša.” Ke rile, “Bjale, bjale ngwaga wo o latelago, se sengwe le se sengwe se tla retologela morago go namune, a e ka sek e?”

¹³⁸ A re, “Oo, aowa.” A re, “Aowa, swiri e tla tliša pele swiri.” O rile, “M... o gomme mopapalemune o tla tšweletša dipapalemune, gomme monarikisi o tla tšweletša narikisi.”

Ke rile, “Go tšwa mohlareng wa monamune?”

O rile, “Ee, mohlomphegi.”

Ke rile, “Ga ke bone ka fao e kgonago go e dira.”

A re, “Ka moka ke dikenewa tša siterase.”

Ke rile, “Gabotse, tumišang Morena! Ke bona se sengwe.”

¹³⁹ Lebelelang! Oo, ngwanešu, ge Moya wo Mokgethwa wola o etla godimo ka go Morara wola, le go tšweletša go tšwa go Morara wa lona go ya go lekala la mathomo, gomme ba ngwadile Puku ya Ditiro ka morago ga lona, ge mohlare wola o ka tsoge wa hloga lekala le lengwe la setlogo, o tla godiša selo sa go swana. E tla ba Jesu Kriste. Bjale re na le Methodist, Presbyterian, Baptist, Lutheran, se sengwe le se sengwe gape se hlomeseditšwe ka go wona, se enywa kenywa ya kerekela; eupša ge o ka tsoge wa hlogiša lekala le lengwe, le tla ba la mmapale, la go tlala ka Kriste, Lentšu la Modimo le tsengwagare go Kriste.

¹⁴⁰ Gomme, elelwang, le elelwa molaetša wa *Mohlare Monyalwa*. Ba bantsi ba lena ba tsea theipi. Kafao molemi a ttilego pele, gomme o be o enywa mohuta wa go fošagala wa kenywa, kafao o o ripile, o o ripile, a fela a o ripa morago, a o ripa morago. Eupša Joele o rile, “Tše mogokong o di šiilego, phatakalala e di jele; se mogokong... phatakalala e se šiilego, se sengwe gape se jele.” Re hwetša gore tšona dikhunkhwane ke khunkhwane ya go swana, feela ka legatong la go fapania. Gomme se Lutheran e se šiilego, Methodist e se jele; se Methodist e se šiilego, Baptist e se jele; se Baptist e se šiilego, Mapentecostal ba se jele. Selo ka moka se ripetšwe fase.

¹⁴¹ Eupša Modimo o rile, “Ke tla bušetša, go rialo Morena, mengwaga yohle. Ke tla romela morago Kereke ye nngwe, ka matšatšing a mafelelo. Ke tla bušetša Maatla ao a setlogo gape. Ke... Ka nako ya mantšiboa, go tla ba Seetša.” Tlase ka pelong ya mohlare wola, ga go kgathale ke makala a makae a thennwego, go tla tšwelela Peu ya Bogoši ya Abraham! Haleluya! Modimo o e tshepišitše. Modimo o tla e dira. O rile O tla e dira. “Ke tla bušetša mengwaga yohle yeo dikerekemaina di e jelego. Ke tla bušetša mengwaga yohle. Ke thenetše selo, eupša efela go tla tla Morara go tšwa pelong ya yona. O tla ba bjalo ka mohlare wo o bjetšwego dinokeng tša meetse, monna yo a naganišišago ka go Lentšu la Modimo, mosegare le bošego,” e sego go thutotumelo goba kerekela, “eupša ba naganišiša ka Lentšu, mosegare le bošego. O tla ba bjalo ka mohlare wo o bjetšwego nokeng ya

meetse; makala a ka se pone. O tla tliša pele kenywa ya gagwe mo sehleng.” Modimo o e tshepišitše.

¹⁴² Modimo, a kgeila go tlemologa, a gogela ntle, a ripa go arogana, a ikaroganya ka Boyena, a ikaroganya ka Boyena. O dirile selo sa go swana ka Letšatšing la Pentecost, ge Moya wo Mokgethwa o etla fase. Pilara yela ya Mollo e theogetše tlase, yeo e latetšego Israele, bohole re a tseba gore e be e le Logos, yoo e be e le Kriste. Gomme ge E etla fase, ka Letšatšing la Pentecost, E dirile eng? E ikarogantše Yonamong, gomme maleme a Mollo a dutše godimo ga yo mongwe le yo mongwe wa bona. Modimo a ikaroganya ka Boyena magareng ga batho. Oo, ngwanešu, o ka kgona go ba wa go se arogane, ka Moya wo o swanago wo o bego o le ka go Kriste.

¹⁴³ “Yo a dumelago go Nna, mediro ye Ke e dirago o tla e dira le yena. Ye megolwane go feta wo, goba *bontši* go feta wo,” phetolelo ya maleba “gobane Ke ya go Tate. Efela, lebakana le lennyane gomme lefase ga le sa Mpona gape, efela lena le tla Mpona, gobane Nna,” lešalaina, “Ke tla ba le lena, ebile ka go lena, mo nakong ya bofelo, pheletšong.” O tshepišitše go e dira. Peu ya Abraham, O fa bjale. O . . .

¹⁴⁴ Re mo, matšatši a se makae a go feta, re keteka tsogo ya Gagwe, gore Modimo o Mo tsošitše. Re a e paka. Re a e opela. Gomme A ka no bonagala le go dira se sengwe seo A se dirilego, feela boka A dirile pele ga tsogo ya Gagwe, re tla e bitsa, “mmolelelamahlatse, diabolo, Beletsebubu,” ra le tswalelela ka ntle ga kereke. Re direlang seo? Go swanetše go phethagatša Lengwalo, gore, ka go Lebaka la Laodikia, Lentšu, e bego e le Kriste, o beilwe ka ntle, [Ngwanešu Branham o kokota godimo ga phuluphithi—Mor.] a kokota lebating, go leka go hwetša tirišanommogo tsoko go tšwa felotsoko, a tla ka gare le go itira Yenamong go tsebjja.

¹⁴⁵ Eupša go tla tšwa lekala ntle ga Kua, feela ka nnete bjalo ka e ka ba eng!

¹⁴⁶ Ke rile go Ngwanešu Sharrit, “Gona ke mohuta ofe wa lekala o tla le tlišago ngwaga wo o latelago? A e tla ba namune? A e tla ba swiri? A e tla . . .”

¹⁴⁷ “Ee, e tla ba la setlogo,” o boletše. “Ge o tšweletša lekala go tšwa go wonamong, e tla ba namune, feela boka le bile kua mathomong.”

¹⁴⁸ Gomme ge ya kgonthe, Peu ye e phelago ya Abraham e etla godimo, Moya wola wa go swana o bilego ka go Jesu Kriste o tla phela magareng ga bona, Lentšu le lengwe le le lengwe le tla feleletšwa ke “Amene.” Ba a Le dumela. E sego, “Le le šušumeditšwe, gomme *Leo* ga se la šušumetšwa.” Ba dumela Selo ka moka, gobane Ke Lentšu la Modimo.

¹⁴⁹ A o a Le dumela, bošegong bjo, ka pelo ya gago yohle? Ke a le dumela.

¹⁵⁰ Ke šetše ke rerile mo bjale go fihla e fihlile nako ye telele. A re inamišeng dihlogo tša rena motsotsa feela. Gomme ke tla fetša ye gosasa bošego. Ke tshepišitše nka se le swarelele thari.

¹⁵¹ Jesu Kriste wa go swana maabane, lehono, le bakeng sa . . . Go tiišetšwa, e ile ya e duduša le Abraham, ge ka tumelo a e bone, o ile thwi pele, a sa thekesele ka go gosedumele. Ga se a thekesele. Bjale go reng ka Peu ya Gagwe ya Bogosi, rena ba re tteleimago, rena Bakriste ba letšatši le, rena re tteleimago go atla komiki ya go swana ye A nwelego go tšwa go yona, re na le Moya wa Gagwe wa go swana ka gare ga rena, le go Mmona a hlatsela tshepišo ya Gagwe ya go ba mo le rena?

¹⁵² Tshepišo, go e dira e phethagale, ga se nke ya ke ya ba bjalo ka go mabaka ohle. Ga sa nka ra ba le yona pele. Phetlang histori. Ga se ya ke ya tšwelela. Gomme E ile kae, e swanetše go ya ka matšatšing a mafelelo? Go Kereke mokgethiwa. E sego go Babilonia, e sego go Sodoma; ba bile le motseta tlase kua. Eupša Moya wo Mokgethiwa ke Motseta go Kereke mokgethiwa, bošegong bjo, Modimo a dula ka nameng ya motho, a ipontšha Yenamong, Mohlathi, Lentšu leo le hlathago dikgopololo le maikaelelo a pelo. “Jesu Kriste wa go swana maabane, lehono, le go ya go ile.” Ke Yena Jehofa-Jireh. O šetše a file Sehlabelo sa rena, gomme o tiišetša kgwerano ya Gagwe. O boloka kgwerano ya Gagwe, ka matšatšing a mafelelo, le batho.

¹⁵³ Bagwera, re ka kgona go bolela mo bošego bjohle. Dilo tše di boletšwego, go boletšwe go lekanela. Go na le batho mo ba ba babjago; o hloka phodišo. Gobaneng o sa dumele Leo? Ge nka kgona go go fodiša, ke tla e dira. Eba go rapela. Ge nka kgona go go fodiša, ke tla e dira. Nka se kgone go go fodiša. Ke . . . Le a hlokomela, ke fa tirelo, bošegong bja mathomo goba a mabedi, mo, go rapelela balwetsi. Gomme seo ga se feela go seo. Ge eba go ne Peu e ka ba efe fa yeo e beetšwego go Bophelo, Moya wo Mokgethiwa o tla e swara. Ba tla e bona. Ba tla e tseba. Bjale O . . .

¹⁵⁴ Ke ba bakae ka fa le ka emišago diatla tša lena, pele ga Modimo, gomme la re, “Ke e dumela ka pelo ya ka yohle, gore Jesu Kriste o a swana maabane, lehono, le go ya go ile; gore O tsogile go tšwa bahung, gomme O a phela magareng ga rena bošegong bjo, a ipontšha Yenamong go ba magareng ga rena, gomme ke a dumela ke ya Modimo”? A o ka phagamiša diatla tša gago, le go re, “Ka therešo ke a e dumela”?

¹⁵⁵ Bjale, Tate wa Legodimong, ba ka diatleng tša Gago. Bona ba . . . Ba tteleima gore ke bona Peu ya Abraham. Ba—ba nyaka, ba—ba nyaka ditšhegofatšo tša Modimo. Gomme bjale ke ba boditše, ka go ye bonolo ye, tsela ye nnyane. Ke thomile go sehlogo sa ka, gomme ga se ke hwetše go e fetša. Eupša, Tate, ba—ba bona mo, ka go tiišetšo go Abraham, gore O tiišeditše tshepišo go yena, go mo fe tiišetšo. Bjale ge mo—ge Moya wa Kriste o se

ka go rena, gona ga re selo sa Kriste. Gomme tlhago ya Kriste e ka se fetoge.

¹⁵⁶ Gomme gabotse O re boditše, le go tshepiša dilo tše go ya ka Beibele, ka lefelong le lentši. Le Testamente ya Kgale e e tshepišitše, ka go Maleaki 4, gore ka fao go tla bago ka matšatšing a mafelelo, “O tla retollela dipelo tša bana morago go Tumelo ya botate,” bjalo ka botate ba Pentecostal, Thuto ya setlogo ya Beibele, Lentšu la setlogo, sela se Le tla se dirago. Gomme go tla ba le leswao, gomme leswao le le tla tiišetša, la tiišetšwa ke Segalontšu seo se tla e latelago, gore O mo. Gomme re a Go dumela.

¹⁵⁷ Bjale, Tate, a nke—a nke Sathane a dire tsela ya gagwe. Ga re—ga re dumele gore re ne maatla e ka ba afe, Morena. Ga re tteleime go ba le maatla. Re tteleima go ba le maatlataolo.

¹⁵⁸ Re a lemoga, lephodisa le lennyane mo mokgotheng, ka kefa ye nnyane e dutše godimo ga hlogo ya gagwe, ka dikoloi tše kgolo di swiela go theoga tšona ditsela tša phariri, ka dimaele tše masomesenyane ka iri, ka mmootho wa maatla a pere a makgolotharo, ga a na le maatla go emiša e tee ya tšona. Di tla no mo šilaganya thwi go theoga. Eupša a nke a no bontšha petše yela, gomme a phagamiše diatla tša gagwe, dipriki di tla tswinya le dithaere di tla hama. Ke maatlataolo. Toropokgolo ka moka e ka morago ga gagwe. O na le maatlataolo, e sego maatla. A ka no se imele diponto tše lekgolo, eupša o na le maatlataolo.

¹⁵⁹ Gomme ke ka tsela ye go lego bošegong bjo, Morena. Re tla go Sathane, e sego ka maatla, eupša ka maatlataolo, go bontšha Madi le tiišetšo ya kgwerano. Ga a na tokelo go swara batho ba ba babjago.

¹⁶⁰ Go lebelela godimo ga bona le go ba bona ba e hlagahlagela ntłe, fa, O Modimo, ge go na le tsela ye nngwe nka kgonago go no fihliša Molaetša go bona! Ge ba ka kgonna feela go bona, Morena, feela go lemoga! Ba tsoše, Morena. Nako ye nngwe bjale, bošegong bjo, a nke ba bone gore O Modimo wa go swana. O tiišetša Lentšu la Gago. O Le boloka feela bjalo ka ge O tshepišitše. Mo matšatšing a a mafelelo, O rile dilo tše di tla direga, “Ge Morwa wa motho a utollwa,” gore dilo tše di tla direga. E fe, Morena, gomme a nke ba bone gore ke Wena. Ka Leina la Jesu, ke a rapela. Amene.

¹⁶¹ Bjale dumelang, bagwera. Le batheeletši ba bakaone bjalo. Ke sa tšwa go feta nako ya ka, le a bona, gomme ga—ga se ka re go dira seo. Ke ba boditše ke . . . re tla be re le ntłe ka nako, bošegong bjo, eupša ke šitilwe gobane ke . . . Gomme ke tla fetša sehlogo sa ka gosasa bošego, mohlomongwe, Morena ge a rata.

¹⁶² Bjale ke rena ba. Le batho. Bohle re no ba batho. Re nyaka go phela. Yo mongwe le yo mongwe o nyaka go phela nako ya gagwe. Ke a dumela Modimo o nyaka re dira seo. Ke—ke a e dumela. Bjale, ga se ka gobane ga go ne Moreku ka Gileada.

¹⁶³ Le a tseba, go boletšwe nako ye nngwe, “Gobaneng, gobaneng go le? A—a ga go moreku ka Gileada?”

¹⁶⁴ “A ga go moprofeta fao?” Jesaya o rile, goba, ke ra Eliya o boletše. “Eya o mmotšiše, ‘A ke ka gobane ga go moprofeta ka Israele? Gobaneng o eya Ekironi godimo fale, modimo Baalisepubu? Gobaneng, eng, o eya godimo kua?’ Yena go beng Mojuda, ‘Gobaneng o eya godimo kua?’”

¹⁶⁵ O rile, “A ke ka gobane ga go moreku ka Gileada, ga go na matwetwe fao? A ne? A leo ke lebaka?”

¹⁶⁶ A ke lebaka leo? Aowa, Mohlomphegi. Re na le Moreku. Moya wo Mokgethwa o fa. Ee, mohlomphegi. Tshepišo ke ya rena. Bjale o swanetše go no e dumela. O . . .

¹⁶⁷ Ke letšatši go moo monagano wa batho o phatlaladitšwego kudu, ga ba . . . Ke ba kwelabohloko. Ga ba tsebe ba dumele eng. Yo motee o bolela *se*, gomme yo mongwe o bolela *selā*. “Gomme a nke lentšu la motho yo mongwe le yo mongwe e be maaka, gomme la Ka e be therešo,” Morena Modimo o boletše. Yeo ke nnete. Bjale A ka se kgone go fetola tlhago ya Gagwe.

¹⁶⁸ Bjale, ke a dumela bošegong bja go feta re thomile karata ya thapelo tee (a e be e se yona?), gomme ra bitša go fihla go e ka ba masomepedi, goba se sengwe boka seo. Huh? A re no fetolang tshepedišo yela. A re se be le dikarata tše di itšego tša thapelo le gatee. Ee, o no rapela. O a tseba, karata ya thapelo e no go tliša godimo mo.

¹⁶⁹ Eupša ke ikwela Bogona bja Gagwe, kafao ke no tseba O fa. Ke ba bakae ba kilego ba bona seswantšho sa Morongwa yola wa Morena? Kafao nthuše, ge ke kopana le wena mo Kahlolong, ga se dikgato tše pedi go tloga moo ke emego thwi fa. Yeo ke nnete. E fa.

¹⁷⁰ Bjale yo mongwe yoo a se nago dikarata tša thapelo, phagamiša seatla sa gago, o re, “Ga ke ne dikarata tša thapelo, gomme efela ke a babja le go hloka.” Gabotse, e no ba mogohle. Go lokile.

¹⁷¹ Bjale ke tla le botša. Morongwa yola o dirile eng godimo kua nako yela? O retolotše mokokotlo wa Gagwe, o bile le mokokotlo wa Gagwe o furaletše Abraham. Se, ke bego ke eya go fihla go sona, bošegong bjo, gomme ga se ke e dire. Gomme moo A rilego, “E tla ba selo sa go swana mo go tleng ga Morena, bjalo ka ge go bile kua Sodoma.” Re a hwetša, O be a na le magetla a Gagwe a šotologetše tente. Gomme Sarah o segile se A se boletšego, ka gore O mmoditše. Gomme ga se a ke a kgona go kwešiša gore seo, e no ba Monna ntle kua, o ja nama ye a e gadikilego, a enwa maswi go tšwa kgomong, le go ja namane ya yona, gomme yoo e be e le Modimo.

¹⁷² Beibele e rile o be a le. Abraham o rile o be a le, “Elohim.” Yeo ke therešo. “Elohim,” *Modimo*. O timeletše thwi pele ga

Abraham. Gomme, “Modimo,” o Mmiditše, “Morena Modimo, Elohim, yo Motee wa go lekanelo moka.”

¹⁷³ “Mathomong,” lentšu le le swanago le a šomišwa. Moithuti e ka ba mang o tseba seo. “Mathomong *Modimo*,” lebelela Sehebere, “Elohim.”

¹⁷⁴ Hlokamelang ge Abraham a rile, “Morena Modimo, Elohim,” Monna wa go swana, Motho wa go swana, a bontšha gore Modimo o tla iponagatša Yenamong ka nameng ya motho, go Peu ya Abraham, go tiišetša kgwerano, le go dira selo sa go swana A se dirilego, (le a e bona?) selo sa go swana A se dirilego kua. Yena ka mehla ke moprofeta yo a hlahago dikgopololo le maikaelelo a pelo. Gobane, ke ba bakae ba tsebago Beibele e boletše seo, “Lentšu la Modimo le hlatha dikgopololo tše di lego ka pelong”?

¹⁷⁵ Bjale ge Modimo a ka tšeа bonnyane batho ba bararo ka mo, bošegong bjo. Bjale ye ke tlhohlo. Ge yo mongwe a sa nagane gore go bjalo, etla o e dire. Ge ba sa dire, gona le se ke la bolela selo ka yona. Le a bona? Bjale, hlokamelang, go tšeа bonnyane batho ba bararo, (tharo ke tiišetšo), bao e lego basetsebje ka go felela, gomme ge Moya wo Mokgethwa... Ge le ka no dumela, seo ke sohle ke le kgopelago go se dumela, go dira, ke go dumela gore Beibele ye ke Therešo, gomme re phela ka matšatšing a mafelelo, gomme ye ke tshepišo ya matšatši a mafelelo.

¹⁷⁶ Elelwang, Abraham, goba ga go yo mongwe gape, a bonego leswao le lengwe e ka ba lefe go fihla Morwa wa tshepišo a etla tiragalang. Abraham o bone mehuta yohle ya maswao le dilo, godimo go leo, eupša leo e be e le leswao la mafelelo. A ka se tsoge a e roba; tšwelopele ya Modimo. Peu ya Abraham, leo ke leswao la bona la mafelelo. Le a bona? Yoo e be e le wa mafelelo. Modimo! O tsebile, thwi nako yeo, yoo e be e le Elohim. Gomme Jesu o tla thwi morago le go re go tla ba ka tsela yeo, gomme ke rena ba thwi mo lehono godimo ga yona, selo sa go swana.

¹⁷⁷ Batho, ye ke Therešo. Ke a tseba, “Thwi fa ka go ntlopolokelo ye nnyane?” o boletše. Gabotse, ka mehla go bile ka tsela yeo. O tswaletšwe legopong. Go be go se le yo motee e ka ba mang a bego a tla Mo dumela. Eupša e no ba Peu yela yeo e dumelago, yeo e beetšwego go Bophelo, ke phetho. “Bohole Tate a Mphilego ba tla tla go Nna.” Yeo ke nnete. Ga se o swanele go tshwenyega, gore; leina la bona le fale, ba tla le bona. Gomme bjang? Ba tla e dira.

¹⁷⁸ Bjale, le a bona, feela kgopolo, nka—nka rapela le go bea diatla godimo ga lena. Ke ya go bolela ka seo, gagolo ka Lamorena morago ga sekgalela. Eupša ke—ke nyaka le bone gore le ka bea diatla tša lena go Yena. “Yena ke Moprista yo Mogolo yo a kgonago go kgwathwa ke maikutlo a mafokolo ya rena.” A le dumela seo? [Phuthego e re, “Amene.”—Mor.] Le a se dumela. Gomme bjale ge A ka dira seo...

¹⁷⁹ Ke—ke tseba yo mongwe mo. Ke diregile go lebelela godimo, gomme ke bona ba babedi goba ba bararo ba bagwera ba ka

ba dutše thwi fao, yoo ke modiredi, ba mmalwa ba bona fale. Gomme yo mongwe ka hlogo ya gagwe fase, Morena o sa tšo fodiša mošemane wa gagwe yo monnyane, go tšwa go dikgobadi tša bjoko, efela, lehono, o mpiditše ka mogala.

¹⁸⁰ Gomme—gomme monna yo mongwe fao, le lesea la gagwe le lennyane, bošego bjo bongwe, ba be ba gopola gore le be le hwile. Gomme ke be ke le ka Beaumont. Gomme re, bitša, ile godimo, gomme o beile diatla tša gagwe godimo ga ka, a thoma go lla, o rile, “Ngwanešu Branham, Lentšu la Morena le ne nago. E no Mo kgopela.” Ka wona motsotswo woo, lesea le lennyane la tla morago bophelong, gomme la thoma go phela gape. Tate šole o dutše thwi fale, modiredi.

¹⁸¹ Gomme monna yo, koloi e kgeretlane, gomme ya mo lahlela go kgabola se sengwe goba se sengwe, le godimo ka mokoting, gomme ya gobatša bjoko bja gagwe bjo bonnyane, le dilo. Morena o mo fodišitše, o sekeng ka phethagalo. Ba dumetše. Ka phethagalo ba . . .

¹⁸² Bjale le se ke la re ke e dirile. Ga se ka ba le selo go dira le yona. Tumelo ya bona ka go Modimo, seo ke se se e dirilego. O na le tumelo! Tšohle . . .

¹⁸³ Jesu o rile, ka go Mokgethwa Mareka 11:22, “Selo e ka ba sefe! Ge o re go thaba ye, ‘Šuthišwa,’ gomme o se belaele ka pelong ya gago, eupša wa dumela gore se o se boletšego se tla direga, o ka ba le se o se boletšego.” Eupša šele yona, le a bona. Ga se kholofelo; ke “go e tseba.”

¹⁸⁴ Gomme ge A ka kgona go inetefatša go phela Yenamong, yo Motee yo a dirilego tshepišo a ka kgona go inetefatša go phela Yenamong, gomme ga go selo gape ka lefaseng se ka kgonago go e dira. Phafogang! Itšikinye wenamong, thata ka kgonthe, moya wa gago. Le a bona? Ga go selo ka lefaseng se ka kgonago go e dira eupša Modimo.

¹⁸⁵ Bjale o ka kgona—o ka kgona go le ahlola yona ye mpe, ge o nyaka. Ba Mo ahlotše yo mobe, kagona ba ka fele ba sa kgona go ahlola Moya wa Gagwe wo mobe. Ba rile, “O be a le diabolo, a dira seo.” Gabotse, nnete, ba ne moputso woo.

¹⁸⁶ O no dumela. O ka se kgone go fodiša. Nka se kgone go fodiša. Ga go motho yo a kgonago go fodiša. Modimo ke mofodiši.

¹⁸⁷ Eupša ge le ka no lemoga gore yena yo Motee yoo le mo hlankelago, gomme la ikaroganya lenabeng go tloga lefaseng go hlankela, yena Yo le mo ratago; yena Yoo a yago go ema ka Kahlolong, lena ka Kahlolong le Yena, go ahlolwa, ge Bogona bja Gagwe bo ka kgona go tla thwi mo le go laetša gore O mo!

¹⁸⁸ Bjale mmele wa Gagwe wa nama ga o kgone go e dira. Ge woo o etla, nako e fedile. “Bjalo ka legadima le etla go tšwa Bohlabela go ya Bodikela, go tla ba bjalo ka go tla ga Morwa wa motho.” Eupša, Moya wa Gagwe!

¹⁸⁹ Gomme Kereke e tlide, lebelela ka fao e tlago godimo; go kgabola tokafatšo, tlhwekišo, kolobetšo ya Moya wo Mokgethwa; gomme bjale thwi ka go nako ya tlhatlogo, go dira Kereke e lokele. Feela tlwa ka tsela ye e tshepišitšwego, feela ka tsela ye Mabaka a Kereke a lokologantšwego, gomme re bone seo, se sengwe le se sengwe se etla thwi fase, le thwi fase.

¹⁹⁰ Pentecost ke mokgatlo wa mafelelo. Seo ke go ya ka Lengwalo. E tla ba mokgatlo wa mafelelo, o gannwe le ka moka ga yona, yeo ke nnete, bjalo ka mokgatlo. Ga go mokgatlo wo o amogelegago go Modimo. Ke...Ke batho ka batho, ke bona ba amogelwago go Modimo.

¹⁹¹ Bjale a ga le kgone go dumela Bogona bja Gagwe? Bjale fa, ke no ba ngwanabolena, gomme bjale ke rometšwe, gore Modimo o mpoditše go tla go dira se. Kagona, ke a Mo dumela. Gomme ge go be go se gwa ngwalwa ka go Lentšu, bakeng sa lebaka le, ke tla sepela go tloga go lona. Eng kapa eng ye e sego ka go Lentšu lela, ga ke e dumele. Nka—nka se e amogelete. Ga ke re nka se e dumele, eupša ga ke e amogelete; ga ke e kwešiše. Eupša ge e le ka go Lentšu le, le tshepišo ya lebaka le, ke a e kwešiša. A le a dira? A nke Morena a re thuše bjale. Gomme o no... O a obeletša bjale, ka tumelo, wa dumela gore ka go... bogona bja ren... Re ka Bogoneng bja Gagwe, ke ra gore, bjale, ke Jesu yo a swanago yo a dirilego tshepišo yeo.

¹⁹² Gomme ka Beibeleng mo, Paulo yo a šušumeditšwego, yo a bilego le dikutollo ka bontši go fihla a dirwa go tšhoga, "Gomme o bile le bothata nameng, ntle le ge a phagamišitšwe ka godimo ga bottlalo bja dikutollo." Le a bona, o ngwadile Beibele, o be a šušumeditšwe kudu. O ngwadile Dipuku tša Beibele. Boka Moshe, o be a le moprofeta. Ka fao yena, Lentšu la tla go yena, gomme a Le ngwala, gomme a dumelwelwa go ya ka Mangwalong, Dingwalwa tše kgethwa. Bjale o be a le yena yoo—yoo—yoo a bolelago... dumela se, o rutile dilo tše.

¹⁹³ Bjale elelwang gore Kriste o tsogile go tšwa bahung gomme o magareng ga ren. Gomme hwetša seo ka monaganong wa gago, Kriste o tsogile go tšwa bahung gomme o magareng ga ren.

¹⁹⁴ Bjale, re bone mehuta yohle ya mesepelo ye megolo, le go goelela le go tumiša Modimo; tšohle gabotse. Re boletše ka maleme le go profeta, le tšohle. Re bone tšeao tšohle. Seo se lokile. Seo se tla thwi mmogo le Lona.

¹⁹⁵ Eupša, elelwang, selo sa mafelelo ke Bogona bjo Bokgethwa bja Gagwe, Lentšu ka Bolona. Yena ke Lentšu. Hlogo, Lentšu, O tla go Mmele. Le a bona? Gomme ka gona Lentšu leo, ka go Baheberegma temba ya 4, e rile, "Lentšu la Modimo ke le bogajana, la maatla go feta tšoša ya magale a mabedi, le mofenyeki wa dikgopolole maikemisetšo a pelo." Bjale tšeang Lengwalo lela gomme le le kitimiše thwi morago go tloga mathomong a baprofeta, le kitimešeng thwi pele go theoga ka Jesu Kriste,

gomme le bone ge eba seo ga se selo sa go swana, selo sa go swana, gore O tsebja bjalo ka Mesia.

¹⁹⁶ Bjale ga se monna tsoko mo ke Mesia. Ke Moya wo Mokgethwa ke Mesia. Kriste le Moya wo Mokgethwa ke selo sa go swana, kafao šo O fa bjale go no šoma ka nameng, go bea Mmele komana bakeng sa mogau wa tlhatlogo. E dumeleng, bagwera.

Morena Modimo, hle a nke e direge bošegong bjo.

¹⁹⁷ Bjale Leineng la Jesu Kriste, ke tšeela moya wo mongwe le wo mongwe ka fa ka tlase ga taolo ya ka, bakeng sa letago la Modimo. Ke bolela seo gore le tle le kwešiše. Le a bona, le se . . .

¹⁹⁸ Ge o kamaka, ga—ga, ga gwa loka go dula botelele kudu, ka baka la gore batho ba bantsi ba dutše mo, ntle le pelaelo, ba bone se se diregago dinako tše dingwe go basedumele. E tla tloga go yo motee go ya go yo mongwe, boka e dirile ka Beibeleng.

¹⁹⁹ Ke ba bakae ba lena mo ba rapelago, ba tsebago gore ke mosetsebje, ga ke tsebe selo ka wena? Phagamišetša diatla tša gago godimo, gore o a rapela, kafao o a tseba ga ke tsebe selo ka wena.

²⁰⁰ Wena, monna yola a dutšego fale ka thai ye ntsho godimo, o ntebeletše thwi fa.

²⁰¹ Bjale lebelela. O bona Seetša sela? A ga o kgone go bona Seo? Feela mollo, Seetša se setalagauta tlase mo.

²⁰² A o ntumela go ba mohlanka wa Gagwe, mohlomphegi? Ge Modimo a ka nkutollela seo bothata bja gago e lego, o a dumela, o tla ntumela ka pelo ya gago yohle, o tla dumela e be e le Modimo? A o ka e dira? A o tla dumela gore phodišo ya gago e tla tla? O na le karata ya thapelo? Aowa, ga o nayo. Ga o e hloke. Bothata bja gago bo ka tsebeng ya gago. Ge seo e le nnete, phagamiša seatla sa gago. Bo be e le ka tsebeng ya gago; ga bo gona bjale, ge o e dumela. Ga ke tsebe monna, ga se ka tsoge ka mmona.

²⁰³ Bjale monna šo o dutše thwi kgauswi le wena. O mohuta wa go rapela. O rapelela se sengwe sa phošo ka yena. Ntebelele, mohlomphegi. O na le karata ya thapelo? [Ngwanešu o re, "Aowa."—Mor.] Ga o dire. A o ntumela go ba mohlanka wa Modimo? ["Ee."] A o dumela se ke go boditšego, Therešo? ["Ee, mohlomphegi."] A o dumela gore ke Bogona bja Jesu Kriste? ["Ee, mohlomphegi."] A o a dumela gore mokokotlo wa gago o ya go ba ka moka gabotse go tloga bjale go ya pele? O a dira? Phagamišetša seatla sa gago godimo. Ge o ka dumela! O a bona?

²⁰⁴ Bjale botšišang monna. Ga se nke ka ke ka mmona bophelong bja ka. Ga se nke a nkgwatha. O dikgato tše masomepedi go tloga go nna. O kgwathile eng? Seo se phethagatša Lengwalo. O kgwathile Moprista yo Mogolo. O be a dutše fale, a rapela go fodišwa. Le a bona, o kgwathile Moprista yo Mogolo yoo a kgonago go kgwathwa ke maikutlo a mabofokodi a ren. Le a bona?

²⁰⁵ Bjale, o nagana eng, lesogana o dutšego morago kua, moisa yo moswa a ntebeletšego thwi? A o dumela gore Modimo o fodišitše bothata bjoo bja pshio o nago nabjo? O a dira? Emišetša seatla sa gago godimo, ge o e dumela. O nyaka go tlogela mokgwa woo o nago le wona, gape, go lahlela tšona disekerete kgole? Sišinya seatla sa gago ka mokgwa *wo* ge o dira. Gona o bee fase gomme o o lebale. Jesu Kriste o go fodišitše. Ge o ka kgona go dumela!

²⁰⁶ Thwi go kgabaganya go tloga go wena, fale go dutše mohumagadi a rwelego digalase. O tlaišega ka bothata bja letšhogo. A o dumela gore Modimo o tla go fodiša, mohumagadi? Phagamišetša seatla sa gago godimo ge o e dumela. Go lokile.

²⁰⁷ A o ka ntirela monyetla? Go na le mohumagadi yo monnyane o dutše thwi kgauswi le wena, o tlaišega ka bothata bja sesadi, bothata bja sehumagadi. Yeo ke nnete, mohumagadi. Phagamiša seatla sa gago, ge go le bjalo. Tšhollelo. Bea seatla sa gago godimo ga gagwe, gore o tla ba fola, gobane o a dumela.

²⁰⁸ E re, gona a dutšego hleng le yena, tee, pedi, sesela Se thwi godimo ga mohumagadi yola yo mongwe a dutšego thwi hleng le yena. O tlaišega ka maoto a gagwe, bothata ka maoto a gagwe. O dumela gore Modimo o tla go fodiša maoto a gago? Phagamišetša seatla sa gago godimo. Ke wena fao. Le a bona?

²⁰⁹ O dumela Yena go ba Jesu Kriste wa go swana maabane, lehono, le go ya go ile?

²¹⁰ A o a dumela, o dutšego fale? Thwi ka morago ga monna yo a dutšego fa ka pele, mohumagadi yoo a dutšego *fa*? A o dumela gore Modimo . . . O na le dilo tše pedi tša kotsi. Ye tee ya tšona ke kankere; ye nngwe, ke atheraithise. O a dumela gore Modimo o tla go fodiša? Ge o ka dira, phagamišetša seatla sa gago godimo gomme o re, “Ke—ke a dumela.” Go lokile, dumela.

A le a dumela? O tiišetša kgwerano.

²¹¹ Mohumagadi šo o dutše mo o ntebeletše, thwi ka morago ga monna yo. O apere roko ya go lebega bohubedu bja mohuta tsoko. Bohubedu, godimo *mo*; mphufutšo, e ka no ba. O kgole kudu; go fifetš ntle kua. Ka morago, le a bona, seo se go dira o fokole kudu, selo ka moka se no thoma go retolla mohuta wa mmala wa maswi tikologong go kgabola kamora.

²¹² Moo, sesele Se eme, thwi godimo ga gagwe. Le bona Seetša sela? O rapela ka se sengwe. Ge Jesu Kriste a ka nkutollela seo o rapelago mabapi le sona, a o tla dumela ka pelo ya gago yohle? O tla dira? Ke nna mosetsebje go wena, gomme o mosetsebje go nna. Eupša o kgokagana le Moprista yo Mogolo, ka baka la gore taetšo ye A mphago e thwi godimo ga gago, o a bona, o a bona, leswao. Ke a tseba ke yona.

²¹³ O na le bothata bjo bogolo bja letšhogo bjoo o tlaišegago ka bjona. Gomme gape o na le lehwa mogolong, leo o tlaišegago ka lona. Ge seo e le therešo, emišetša seatla sa gago godimo.

O re, "O kgona go bona seo."

²¹⁴ Go lokile, o a tla . . . Ga o tšwe fa. O a tla . . . Ga o tšwe nageng ye fa, lefelong le. O tšwa Memphis. Yeo ke nnete.

²¹⁵ Mohumagadi a dutšego kgauswi le wena, gape o tšwa Memphis. A o dumela ka pelo ya gago yohle, mohumagadi? O a dumela gore Modimo a ka kgona go go fodiša? A o ntumela go ba mprofeta wa Gagwe, goba mohlanka wa Gagwe? Seo se šitiša batho, le a bona. A o ntumela go ba mohlanka wa Gagwe? A o a dumela ke Modimo yoo ke yo a dirago polelo ye? O a tseba nka se tsebe selo ka wena. O dumela e tla ba Modimo gona? Go lokile. O dumela ka pelo ya gago yohle. Gomme o na le, se o tlaišegago ka sona, o na le . . . o na le bothata ka mogolo wa gago, gape. Gomme selo se sengwe, o na le lehuto, sehloga ka lehlakoreng la gago. A o dumela gore Modimo a ka mpotša ke lehlakore lefe se lego ka go lona? Ge eba ke lona, phagamiša seatla sa gago ge nka go botša therešo. Ke ka lehlakoreng la go ja. O a bona? O a bona? A o a dumela gore Modimo a ka kgona go mpotša gore o mang? A seo se tla go thuša? Wena o Mdi. Cox. Yeo ke nnete. O a bona? Eya morago, o a bona.

²¹⁶ A le a dumela? Lena bohle le a dumela bjale? Le a bona, yeo ke tiišetšo ya kgwerano go Peu ya Abraham, ge o ka dumela! Le a bona?

²¹⁷ Fa, go na le mosadi yo monnyane o robetše ntle fa godimo ga leako. A o kgona go nkwa, mohumagadi, o robetšego godimo ga leako leo? Ya. Nka se kgone go go fodiša. Ga ke tsebe selo ka wena; o no ba mosetsebje go nna. Eupša a o dumela gore Jesu Kriste a ka nkutollela seo bothata bja gago e lego? A seo se tla go thuša? A se, se tla dira? Ge o robetše fao, o ya go hwa. O na le feela sebaka se tee go phela, seo ke go amogela Kriste. O na le kankere. Yeo ke nnete. A o dumela gore Modimo o tla go dira o fole bjale? O a dira? Phagamišetša seatla sa gago godimo ge o e dumela. Go lokile. Lefelong la gago, selo se nnoši o ka kgonago go se dira, e tla ba go tsogela godimo go tšwa malaong ao; le go tšeela godimo se o robetšego godimo ga sona, le go ya gae, o tleleima tumelo ya gago ka go Modimo, bjalo ka Peu ya Abraham. Phagamela godimo, ka Leina la Jesu.

Le a bona, o a tsoga, go tšea tshepišo ya gagwe ka go Modimo.

²¹⁸ Ke ba bakae ka moka ga lena le e dumelago ka pelo ya lena yohle bjale?

²¹⁹ Emelela. O na le maatla; Modimo o tla go fa maatla. Phagamela godimo, go maoto a gago. Šole yena, godimo, go tloga go leako.

²²⁰ Bjale ka moka ga lena le nyaka go amogela Jesu Kriste, emeolang godimo ka maoto a lena. Emeolang ka maoto a lena. Emeolang, mogohle, amogelang Jesu Kriste bjalo ka mofodiši wa lena.

²²¹ Morena Jesu, fodiša yo mongwe le yo mongwe wa bona. E fe, Morena. 

JEHOFA-JIREH ¹ NST64-0402
(Jehovah-Jireh ¹)

Molaetša wo ka Ngwanešu William Marrion Branham, setlogong o abilwe ka Seisimane ka Labone mantšiboa, Aporele 2, 1964, ka 4-H Club Barn ka Louisville, Mississippi, U.S.A., o tšerwe go tšwa go theipi ya go gatišwa ya makenete gomme o ngwadilwe ntle le go fokotšwa ka Seisimane. Ye ya North Sotho phetolelo e ngwadilwe gomme ya phatlalatšwa ke Voice Of God Recordings.

NORTH SOTHO

©2022 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE
58 DISA ROAD, ADMIRAL'S PARK, GORDON'S BAY 7140 WESTERN CAPE
REPUBLIC OF SOUTH AFRICA

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Tsebišo ka tokelo-kgatišo

Ditokelo ka moka di bolokilwe. Puku ye e ka ngwalollwa godimo ga sengwalolli sa ka gae go šomišwa ke mong goba go fiwa ntle, mahala ntle le tefo, bjalo ka sedirišwa go gaša Ebangedi ya Jesu Kriſte. Puku ye e ka se kgone go rekišwa, go tſweletšwa gape ka bopepetla, go romelwa go website, go bolokwa go sedirišwa sa go bušetša, go hlathollelwa malemeng a mangwe, goba go šomišetšwa go kgopela ditſhelete ntle le tumelelo ya go ngwalwa ya Voice Of God Recordings®.

Tshedimošo ye e Tseneletšeng goba materiale yo mongwe o leng gona, ka kgopelo ikopanye le:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org